

### ***ASO LUA, 17 IANUARI 2023***

*Na toe faaauau Taulumaga a le Fono Aoao Faitulafono i le itula e 3:01 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatauinia o Tupe Faaopoopo (Nu.1) 2022/2023.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

E i ai le talitonuga ua maua foi se faasiligamalosi i le tatou malologa sa i ai. Faafetai faamalolosi mai mo le uunaiina lava o le tatou galuega.

E faataatiaese a tatou Taulumaga i le itula e 1:00 i le aoauli ua maea le saunoaga a le sui usufono mamalu mai Safata 1. Ia, ou te iloa o la e ua toe oomi mai le moli a le sui usufono. Ae mo le silafia e le sui usufono, na e lauga e le i afa le 12:00, ae talu ai o le tele o faauilavea na mafua ai ae ia e manatua foi, e i totonu uma lava faauilavea i lou taimi. O le mea lea, ia, se i tulai mai po o le a le mea lena e te tau saunoa mai ai.

**Afioga LEANA RONNIE POSINI:** Lau Afioga i le Fofoga Fetalai, ia e tumu lava i le ava i lau Afioga pe a saunoa lau Afioga. Ia ae ou te faafetai tele i lau Afioga, o lea ua e toe tuu mai le avanoa e faauma atu ai loa lenei itumalo. Ma le agaga faaaloalo.

Lau Afioga, ona oo mai lea o se manatu o lenei itumalo, i le mea lea na taua o le carbon credit. E momoli lou agaga faafetai tele lava i le Minisita o le Siosiomaga, lea na ou maua ma ou faalogologo i le faatalanoaga i luga o upega tafailagi, lea na ona ia faamaninoina lelei le mataupu lea, leaga ua alu talaave i atunuu mamao aemaise o tatou tagatanuu Samoa, ua faitau piliona tupe a le tatou Malo ua leiloa, lea na maua mai i le mea lea o le carbon credit, a o lea la sa faamanino lelei e le Minisita e leai lava se mea faapena. O lea e momoli atu ai le faafetai tele i lau Afioga i le Minisita, aua ou te talitonu o le poto faapitoa lea ma le agavaa o lau Afioga leaga o lau matata tonu lava lea. Ae a oso mai ai le tagata e le malamalama, ia ou te talitonu e pogisa atoa ai le atunuu ma le lalolagi. A o lea la ua saunoa le Minisita, faafetai tele lava. E lelei le toamalie ai o le atunuu ma le lalolagi

o faalogologo mai, lea ua e faamaninoina, e leai lava ni tupe o maua ai. E momoli atu ai le agaga faafetai tele.

Ona oo atu ai lea i le tatou tai \$1miliona, oi tatou tupe ia. O le matou itumalo foi lau Afioga o lea e aafia foi i le mea lea o le taofi o le \$150,000. Ae mo le silafia foi o lea ua maua ua saunoa le Minisita, o lea e tausaili tupe nei o itumalo nei, e leiloa po o fea le mea o faaaoga i ai tupe. Ia, o le matou itumalo la e faalogologo mai, o la ua maea le fale fou, sa i ai foi le asiasiga a le Matagaluega na agai atu na latou molimauina le fale ua maea le fale. O le fale foi lea na fau, na fau lava le matou fale i taiala na avatu, i le ata lea na avatu e le tatou Malo lea e fau ai. Ia, ae ou te taamilomilo foi i fale ia o tatou itumalo i isi itumalo, e ese lava le fausaga na avatu ai i le taiala, e ese lava foi le faiga o latou fale. A o le itumalo lenei, o la e na follow lava i ata na avatu. E oo foi i le faaaogaina o tupe i alauni o Komiti ma tulaga faapena, o la e lava e faatino. A o lea ua ou tei ua aafia atu ai foi ma le matou itumalo, a o la e faafogafoga mai le matou itumalo.

Na pau lava lea lau Afioga i le Fofoga Fetalai, afai o lea ua taua mea ia o... o le a le mea e le faataatia ai i le tatou Laulau-a-Fono Lipoti ia a Suetusi ia i itumalo ia ua uma ona sue a latou tusi. E manaia foi le faataoto e silafia ai e le tatou Palemene nei po o mulimuli i taiala ia e fai. Aua o lau lea maitau, o le manino lea, ia malamalama lelei le tatou Palemene ma le atunuu, o ai la la e follow i taiala ia na aumai, pe na follow i ata ia na aumai ma le tupe e faaalu ai. O tulaga faapena. Aua pei o lea ou te tau maitau atu i le saunoaga a le Minisita o Faatoaga, o lea e tau suesue tupe. A o le agaga faanoanoa lena, e faanoanoa ai, o la e faalogologo mai le itumalo. Ia, taoto atu leaga o lea e le o afio mai le Afioga i le Minisita o lo o feagai tonu ma lea Matagaluega. Ia pei o le faanoanoaga lena o lenei itumalo i le tulaga o le...

**Afioga Hon Mulipola Anarosa Ale Molioo (Minisita o Tupe):** Lau Afioga i le Fofoga Fetalai pe maua se avanoa?

**FOFOGA FETALAI:** Ia, onosai mai le sui usufono mamalu se i tuu atu le avanoa i le Minisita. Tulai mai le Minisita o Tupe.

**Afioga Hon Mulipola Anarosa Ale Molioo:** E leai se agaga e faalavelave i le saunoaga a le sui usufono, ae ou te tulai i lou tulaga ona o lea ua tuuina mai foi ia te au le vaaiga o le Matagaluega, ona o lo o toesea foi le Afioga i le Minisita i sailiga togafitiga. Ou te oo mai i le Matagaluega o taatia le tusi a le Afioga i le Minisita ua maea tuuina atu i a tatou itumalo ia o lo o i ai sina faaletonu. O lo o avatu manino lava i le tusi lea a le Afioga i le Minisita ia nisi foi o vaega e agai i le Lipoti a le Suetusi, ia ma nisi foi o faafitauli o lo o matau le Matagaluega ma le Afioga i le Minisita e ao ona foia. O le tusi la lea a le Afioga i le Minisita o le aso 22 o

Tesema na tuuina atu ai, ma avatu ai i le tusi lea, ia oo ifo i le aso 9 o Ianuari 2023 ua tuuina mai se tali e ala i mataupu ia e tataua ona soalaupule i le lotoifale faa-itumalo. Peitai ane, e oo mai i le taimi lenei i le aso 17, e le i oo mai lava se tali o le tusi lea na tuuina atu e le Afioga i le Minisita.

E pei o tulaga na lau Afioga i le Fofoga Fetalai e ao pea ona faamanino, aua o le tali foi lea i nisi o mataupu na laga e nisi o sui usufono e tusa lava agai le tatou mataupu lea. Ma le faaaloalo.

**FOFOGA FETALAI:** Ia, ou te iloa o lea ua manino le saunoaga a le Tamaitai Minisita o lo o ia vaaia foi lea Matagaluega i lenei vaitaimi a o toesea le Afioga i le Minisita. Ia o lo o i ai lava tusi na tuuina atu, a o lo o faatali foi le Matagaluega.

Ia, faauma maia lau saunoaga le sui usufono mamalu mo Safata 1.

**Afioga LEANA RONNIE POSINI:** Faafetai tele i lau Afiogai le Fofoga Fetalai, faafetai foi i le Afioga i le Minisita i le mataupu ua laga. E leai sa usitaia lava le faatonuga o le tusi na avatu e le Minisita, na ma feiloai ai lea, leaga o le a ou taua o la e faafofoga mai Palusalua po o le afioga ia Afemata. Na ou o o i ai ma talanoa, ia ua uma la ona toe soalaupule o la ua tulaga fai mai o le le agavaa o le Komiti. Ia o le tulaga lena, ona tali lea o le afioga ia Afemata o le a fesootai mai i le Afioga i le Minisita, ona taatia ai lea o le mataupu ua uma ona soalaupule. Ia pei o le tali atu lea, na tali lava e le i o o i le aso 9 lea o Ianuari le faamoemoe lea.

E pei o le tali atu lea e faamalamalama ai i lau Afioga i le Minisita. Ae o lau lea faitau, e 5 tausaga o le Paeaiga lenei, o le tausaga lona 3 lenei o le tatou Paeaiga, toe o le 2024, 2025, ona tatou toe sauni loa lea i le faiga palota. A o lau matau...

**FOFOGA FETALAI:** E lelei le faasao atu o le saunoaga a o le i... e atoa ia Aperila nei le 2 tausaga o le Paeaiga lenei, ina ia aua ne i faaseseina le faafofoga mai a le atunuu. O Aperila i le aso 9 o Aperila i le tausaga lenei e atoa ai le 2 tausaga o le tatou Paeaiga. A o le faigamalo, o lea faatoa 17 masina mo le silafia e le sui usufono mamalu.

**Afioga LEANA RONNIE POSINI:** Faafetai tele i lau Afioga i le Fofoga Fetalai. E pei o le agaga lea ou te tau fai atu, 2025 ua faamaea le tatou Paeaiga ua faataape ae tatou alo loa i le faiga palota i le 2026. O le 2023 lenei, 2024 lea e totoe ma le 2025 ona uma lea o le tatou Paeaiga uma le tatou 5 tausaga. A o lau faitau, ia, o tatou tupe ia na aumai i tatou itumalo, o le \$200,000 lea ua... A saili foi i faamaumauga na e i ai, o au lava na ou fesili i totonu o le Palemene lenei o le matou itumalo, pe faaatoa mai le \$800,000. Ou te le i maua foi se tali.

**FOFOGA FETALAI:** Ua manino le faamalamalamaga a le Malo i le tulaga lea, ua ou fautua atu i le sui usufono. Ua manino le faamalamalamaga a le Malo lea, e le mafai foi ona tatou toe foi i tua. Atonu o lea lava e taumafai mai le sui usufono, ou te le toe mafai foi ona tuu atu se avanoa i le Malo e toe faamalamalama atili ai lenei mea ua taatia i le Maota. Malie le sui usufono faauma maia, o lenei lava ou te tuu atu le avanoa. A o i ai se mea taua o totoe, ia fai mai loa i le taimi lenei ae se i faagasolo le tatou galuega.

**Afioga LEANA RONNIE POSINI:** Faafetai tele i lau Afioga i le Fofoga Fetalai. E pei o le ala lea o lou taumafai atu. O lea la ua amata ona faamatuu le tai \$150,000 i itumalo, \$150,000, ae \$850,000 lea e le i aumaia, o tupe ia e fai ai a tatou atinae. O lona uiga o lea e ala ai ona taumafai atu le matou itumalo, toa aumai foi le \$150,000 lea o lea toe 5 masina ona uma lea o le Tala o le Tupe. Ae aumai atoa lea tupe e totoe se i fai ai loa atinae a itumalo pei ona galulue ai, aua pei o le tulaga lena lea sa taumafai atu ai, 2024 aumai le isi miliona, 2025 aumai le isi miliona, ia ua tele atinae e galulue ai tatou itumalo.

**Susuga Hon Laauli Leuatea Polataivao Fosi:** Lau Afioga i le Fofoga Fetalai...

**FOFOGA FETALAI:** Ia, o le mea tonu lava lea na ou talanoa atu ai, lea o le a toe tulai mai le Malo e toe fai atu se tala, ua uma ona i le Maota le saunoaga a le Malo e faamalamalama lea tulaga, ae le mafai lava. Ia se i saunoa mai lau Afioga i le Minisita.

**Susuga Hon Laauli Leuatea Polataivao Fosi:** Ioe pei o le ala lea na fai atu ai foi le faamalamalamaga muamua. O le auga lava lea e avatu, o le mulimulitai o a tatou faiga faavae. O le mea lea i lou itumalo, e le i mau mai se tali i le taimi lenei. O le tusi lea e saunoa i ai le Minisita o Tupe. Afai la ua uma ona soalaupule, tusi mai le tusi e faamau i i ona manino lea, e le faia i tua tou upu, leaga e tele le aafiaga o le mea lea na taofi. O le tou itumalo lava na valaau mai Leana, taofi le mea o lea e le o manino a matou Komiti. Ae amanaia le mea lea ua saunoa mai ai le Minisita, o i tatou te savavali ai i luma, o le soalaupulega ina ia... E le tau fai atu o lena foi e i ai foi nai feeseeseaiga o si ou itumalo. A o alofaaga molipo lea e fai atu, afai ua uma ona outou feiloai ma isi sui o le Komiti, o le auala lena e alu ai i luma, a ia tali mai leaga o lea e mau i faamaumauga ia na aumai le Matagaluega, e tou te le i tali mai i le mea na avatu e sau ai le tali e migoi ai i luma le tou poloketi. O si au toe faamalamalama atu lea.

**FOFOGA FETALAI:** Ia, vaai la i le manaia o le mea lea o le aumai o faamaumauga ma tali mai ai e mautu lelei ai. Ia o lea lava e i ai si faatamala o le itumalo ma lau Afioga i le sui usufono, o lo o talia le tali mai tusinga ona maea ai lea o lea tulaga.

Ia, ou te manatu ua manino lea tulaga lau Afioga i le sui usufono mamalu.

**Afioga LEAANA RONNIE POSINI:** Ia, lau Afioga i le Fofoga Fetalai pei ona ua uma ona fai atu se tala, ua uma le feiloaiga ma le afioga ia Afemata, ua uma foi tulaga o teuteuga o le matou Komiti, o la e sa tuu i le matou feiloaiga ma Afemata, aua o le tusi na aumai ia te au ma le tusi na ave ia Afemata. Ona saunoa lea o Afemata o le a talanoa ma talanoa mai i le Afioga i le Minisita ua uma ona teuteu le tulaga lea. O lau tali atu lea aua o la e faalogologo mai le itumalo, ne i te i ua faapea ua ou faia se tala pepelo, a o la e fafoga mai le itumalo, ua uma ona teuteu i tulaga faa-Komiti.

Ia, e talitonu foi lau Afioga i le Fofoga Fetalai, faafetai tele lava mo lou avanoa. Faafetai foi i le Fono mamalu a le Palemene. Ia maua le tofa i lau Afioga aua le faafofoeina o le tatou Palemene nei. Ma le agaga faaaloalo faafetai.

**FOFOGA FETALAI:** Malo saunoa, faafetai lava mo le faaso, o lea foi ua faafofoga atu le tatou Malo mo mataupu foi sa laga e le sui usufono mamalu.

Ia o le avanoa lenei mo se tasi o sui usufono. Ia, o lea ua matau atu o lea ua fou mai le sa o Aana Alofi 2. Lau Afioga Aiono.

**Afioga AIONO TILE GAFA (Aana Alofi 2):** E fatalofa atu i lau Afioga i le Fofoga Fetalai. Faafetai foi mo le avanoa ua tulai atu ai ma le agaga faaaloalo lenei itumalo ma lenei usugafono e tusa ai ma le Tala Faatatau Faaopopo o le Tupe ua i luma nei o le Laulau-a-Fono a le Palemene.

Ia, e faatalofa atu foi i le paia o le tatou Maota i lenei talaga i lau Afioga i le Sui Palemia aemaise le paia o le saofaiga a le Kapeneta. Malo faafetai galulue. E faapea foi i le paia o Minisita Lagolago. Aemaise foi lenei talaga i le afio atu o le Sui Taitai ma le mamalu o sui usufono.

Le mamalu foi o le tatou Ofisa Sili o Pulega o Matagaluega, lau Afioga i le Loia Sili ma le paia foi o le Ofisa i lau Afioga i le Failautusi ma lou auvaa ma le mamalu o Samoa ua tatou mafuta ma faatasi i lenei vaega o le Fono a le Palemene. Malo faafetai.

Viia le Atua, faafetai i Lona agalelei ua faaalua lava Lona alofa ma Lona le tuulafoaiina o le folauga a Samoa mai lava i lenei tausaga, e ui lava ina lutia i puava, a o lea ua to i tua Apolima, ua tatou mapu mai ma tatou ea



matou ekalesia o lo o faatupeina lava e le tina o le galuega. O ia lea o lo o taitaia le aoga, aua o o lava i le maota o le galuega ma le fanua o lo o tu ai le aoga faataitai.

Ae pei o le talosaga lena lau Afioga, tuuaia ia le isi vaega o aoga a le Ekalesia, o la e lava e faasolo e tofogi lava e Ekalesia ia. Atonu e i ai se taimi. O le faasologa lea ma fuafuaga a le Malo, atonu e i ai se taimi. A o aoga lava ia faataitai ma aoga amata, pei ona ou talanoa atu i si a matou Ekalesia, e le na o le Ekalesia EFKS, o lo o aoga uma ai lava alo ma fanau a lena itumalo i le aoga lea. A o le tulaga lena, o lo o fesoasoani lava le tina o le galuega i le faatupeina o seleni ma tofogi o faiaoga. Ma o lea foi ua malamalama ma silafia lelei, o i lava o le amataga lea o le ola aoaoina o fanau, e break ai le mafauafau agai ai i le lumanai. O le mea foi lea e i ai, atonu o le tulaga lea e i ai e le mafai lava ona ulufale le tamaitiiti i le aoga Primary School pe a le ui atu i le auala lea. E tatau lava ona aoga faataitai ona alu lea ua faigofie ona ulufale atu i le Year 1 o le Primary School.

E pei o le tualga lena lau Afioga i le Fofoga Fetalai, a o faafofoga mai le Afioga i le Minisita, ia e tatalo atu, ua fai si leva o le tulaga lea, a o lo o taumafai lava. E moni lava o lo o i ai le vaega o le sosiaete a matua e lagolagosua i ai, a o nisi vaega e le o ni tulaga e pei ona ou talanoa atu, ia ona o le tulaga lea i le tofogi o faiaoga o le aoga faataitai.

Ia na ona tatalo atu taatia atu i tafatafa o lau Afioga silasila i ai pe talafeagai. Ou te talitonu lava e utiuti foi le faasoa ma le tulaga o le Tala o le Tupe, ae faaleo atu pea i luma lau Afioga i le Fofoga Fetalai.

O le isi vaega e fia o o i ai sa matou tala, o le security, o le security po o le malupuipua lea o tatou VIP aemaise lava i tulaga aloaia o le tatou atunuu. Ia lea ua saua foi i saunoaga a nisi i tulaga o puipuiga ona o nisi foi mea sa aliali mai, ae pei o le vaaiga lautele lena.

O lea e vaai atu i le saunoaga a lau Afioga i le Minisita o Tupe le tupe lea o lo o faataoto mo le Pulega o Malaevaalele e faamoemoe e faaleleia ai masini ma meafaigaluega aua le faafoeina o auaunaga masani a le Pulega o Malaevaalele, ground handling services. Ua maua se avanoa e faaleo ai se tala ma le faaaloalo o la e faafofoga mai lau Afioga i le Minisita o Galuega ma Atinae Tetele. E le i leva nei le faalavelave lea na tupu mai lalo i le malaevaalele i se tasi ua alu i totonu o le vaalele ma malaga ese atu ai lava. Ioe, sao atu ai. Ae ou te iloa o le isi lea vaega o le puipuiga o le tatou atunuu, o le puipuiga o femalagaaiga. E pei ua ta faalogo i mea e tutupu i atunuu i fafo, ituaiga mea ia o le sao i totonu o le vaalele, e i ai le au faatupu faalavelave. E talitonu e mamao tatou ma ia mea, a o le puipuiga ou te talanoa ai ma le faaaloalo, leaga e le tatau ona tupu. E fai o le mamalu o le atunuu femalagaaiga, a o vaalele foi. E pei o le agaga lena lau Afioga, se i silasila totoa i ai i le tulaga lea ua amata ona aliali mai. Ia ma nisi lava tulaga lautele o le tatou atunuu i le paia ma le mamalu o le saofaiga a tulaga taualoa o le tatou atunuu, mai lava i Le Ao o le Malo

seia... ia, e moni lava i le tulaga o le tatou Palemene, ia, e tataua ona silasila i ai ma tagai i ai ina ia mapo ma saogalemu le tatou atunuu, aemaise foi pei ona taua o lo o gasolo mai i fonotaga, aemaise e le o ni tamai fonotaga, o fonotaga tetele ia ae utiuti le tatou atunuu aemaise lava i le Matagaluega o Leoleo ma e masani ona latou vaaiia tulaga ia.

Na o le talanoa atu i tulaga ia lau Afioga i le Minisita, se i silasila ma tagai i ai i tulaga ia. Ma le faaaloalo.

Lau Afioga i le Minisita mo le Siosiomaga ma Punaoa Faalenatura, ou te iloa o lea lava... o au e avatu loa se tala, ou te lauga loa i se mataupu, e le mafai ona ou toe faalavelave. Na taoto atu lava sau tala i le taimi o le Tala Faatatau Autu o le Tupe i lena tausaga, ona o le ma soli vale atu ma le tama faifeau o lou ofisa, e talosagaina le fesoasoani mo le matou tuamaota o le Hall EFKS, ona ua matua lamatia lava le tulaga o lo o i ai. Ae pei na ona avatu ia se faamanatu lau Afioga i le Fofoga Fetalai.

Lau Afioga i le Minisita, ia, se i silasila ane, ae faafetai mo le tusi sa tali atu, faafetai mo le tusi sa tali atu, ua talia. Ae o lo o talia le tulaga o seleni e faatino ai ia tulaga e pei ona maua le galuega foi ma le asiasiga ae na ona faamanatu atu lau Afioga i le Minisita tulaga ia. E le gata i lea, a o le faataufusi lava lea pei ona ou avatua foi le talosaga lea i totonu lava i i le matou pitonuu, o le tulaga lamatia o le soifua maloloina pe a to timuga ma leaga le tau. O nai aiga aemaise o nai tama matutua ma nai tina matutua o lo o alaala ma nonofo ai i lea vaega. E pei ona fai atu, e pei e omo i lalo, ae a tafe mai uta i le leaga o le tau, ia e toa uma i i le tulaga lea ma faaleagaina ai maota ma laoa e sao i ai i totonu le vai.

O le ala lea lau Afioga, ou te iloa o le vaega tonu lea e patino i lau Afioga. E pei foi ona matou mafuta ma afifio atu foi le paia o le ofisa ma matou talanoa ma faasino i ai, tapue mai ata. Ae sa manatu, ae lafo atu i lau Afioga, o le a se avanoa, o le a se taimi i lau faasoa ma le tulaga o fesoasoani mo tatou itumalo.

Lau Afioga i le Fofoga Fetalai, e faaleo pea i le agaga se leo o leni itumalo i le tulaga o lo o i ai le tatou folauga i leni tausaga ma tatou te faitau lava i le soifuaga ma le olaga i leni vaitau, i suiga o lo o i ai le lalolagi, o mea e tutupu ma mea e aliali mai. Ia tatou te faapea o le taua, o le taua, o le siitia o le a, ia a o le tau lava o le soifuaga, ou te iloa e i ai lava se avanoa i le tatou Malo lau Afioga i le Sui Palemia, vaeatu le toesea o le Afioga i le Palemia ma le paia o le Kapeneta, ou te iloa lava e i ai se avanoa e silasila totoa. E faamanatu atu le matou tuualalo, silasila i ai po o le a lava se tulaga e maua ai se fesoasoani. Afai foi e le gafatia, ae na o sina vaega e iloa ai o lea o lo o galulue ma taumafai le tatou Malo aua le taugata o le soifuaga i leni vaitau.

Ona ou toe foi atu i lau Afioga i le Minisita o Punaoa Faalenatura ma le Siosiomaga. E manatu i leni vaitaimi i le leaga o le tau, le leaga o le tau. A o le tulaga lea e i ai, talofa i le aufaigaluega, talofa i le Matagaluega o



Leoleo. Sa ou raise ina le mataupu lenei i totonu o la matou komiti. Ae vaai pea vaai pea, ai lava ona o le uiga lea o le tatou atunuu, e tiga lava ona iloa le tulaga e lamatia ai le soifua, ae le kea lava. O le uiga o sau faamatalaga, o le tulaga foi lea o le aumai o le faasalalauga a le Ofisa o le Vaaitau, ua faasa, ua sou le sami tapunia alavaa, e le tatau ona aua ona toe o nisi i le sami ma tulaga faapena i tulaga i taelega. A o le mea lea e i ai, ua tapuni alavaa ua tutu vaa e feoi i le va o motu. A o vaa fagota ma paopao, e leai o lea e o lava, e o lava e fagogota, aisea? Ona o le uiga na e pei ona ou talanoa atu. O le uiga lava lea o le tatou atunuu, ae o le tuualalo se i silasila i ai, o lea e le o afio mai le afioga i le Minisita o Leoleo, silasila i ai i tulaga ia e tatau ona fai se fua, leaga e moni lava o le uiga o le Samoa e faalogogata, ae talofa i mafutaga, talofa i faalavelave e tutupu mai ai. E tele ai ma galuega a le Matagaluega, e tatau ona silasila i ai po o le a se togafiti. E le i leva atu nei sa o tatou matauina lea tulaga na tulai mai i le motu o Savaii, ua leai se aoga ua le aulia le Kirisimasi, ae o le tulaga lena. E tiga lava ona tuuina mai ma aumai le tuualalo a le Matagaluega ma lapataiga e le mafai lava. O lena e faafofoga mai lau Afioaga i le Minisita lau Afioaga i le Fofoga Fetalai, se i silasila i ia tulaga. Ia fai le faasalaga talafeagai. E moni lava o alii ma faipule e fesoasoani mai, ae a i ai lava le tulaga faalekeakea ma tulaga faapena, ona talofa lea i mafutaga, ioe o tina ma fanau e aliali mai ai faalavelave faapea.

Lau Afioaga e momoli lava le agaga faafetai i lau Afioaga i le Minisita o le Soifua Maloloina, malo le galue. Ia faafetai foi e vaai lava le suiga o le matou falemai i Leulumoega. E ui lava ina vaai ma le alofa i faalavelave ma mea tutupu, e le mafai lava le tau alofa foi i ai ma vaai atu ua tau le fiafia alii ma tamaitai tausi mai, ona o tulaga lava ia. A oo loa ina vevesi le atunuu ma fia muamua ma manao loa e serve ona i ai lea o tulaga faapena. A o lea lava e matauina le sologa lelei ma le sologa manuia, ai ona ua oulua toalua ma le susuga ia Aiono le Ofisa Sili, faafetai, e tutusa lelei, ua ou matamata atu nei i le taeao i le saofafai mai o le Ofisa Sili o le aoga ma le Ofisa Sili o le falemai, oka se manaia. E tutusa lelei fuitino, maualuluga papae, ia viia le Atua, atonu ua tele le fesoasoani i lau Afioaga i le Minisita o Aoga ma lau Afioaga i le Minisita o le Soifua Maloloina. O le agaga fiafia lea, sagai ane ai o le tai, ua le tuu mai i i, ae fia fai atu i ai se faamanuia, aua lo la alofaiva, malo faafetai.

E muliai sau tulai i lau Afioaga i le fofoga Fetalai, i le tulaga lea o le poloketi. E talitonu o le isi lenei itumalo, o lea o lo o aofia i totonu o le 10 lea. Lau afioga i le Tamaitai Minisita o lo o tauaveina lenei vaitaimi i le toesea o le Minisita o le poloketi. Ou te le iloa po o le a se isi tala e fai atu, e pau lava lau tatalo o la e faafofoga mai si ou itumalo. Ua maea mea uma, ua maea, afai o le tulaga i le matou komiti, ou te le iloa po o a faamatalaga ia e aumai i lau afioga i le Minisita o Faatoaga. E le iloa po o a faamatalaga ia e aumai. O le matou komiti, e tau sao atu lava, na o au lava le HRPP ma

le isi tama e toatasi, e FAST uma le matou komiti. E leaga o lea na ou faalogo atu, o saunoa fai mai e le o paleni, e i ai nisi tulaga e aliali mai. O lena ua ou faamanino atu o la e faalogo mai lo matou itumalo. Aisea? O le iuleo lea sa fai i totonu o upu o le matou komiti, taatia le FAST leai se HRPP ae omai e fai le komiti a le itumalo. E leai se tusitusilima leai se femateai, o le ala lena lau afioga i le Minisita. O a tulaga sa taumafai, o matou le isi itumalo sa taulamua, matou te lagolago i mea uma, peitai ane ua tulai mai se tasi o tina i totonu o la matou komiti, ou te le avatua i luma tulaga ia, e pule lava le nuu ia i ana faaiuga faalenuu. E le feaiaai foi komiti o le itumalo ma le finagalo o alii ma faipule. E leaga o lea ou te talitonu, o le a le mea e fai e alii ma faipule, e lagolago e le Malo, o a foi mea e fai e le Malo e lagolago e alii ma faipule. O le sootaga lena ma le vavalalata lena o le tatou galuega, ae matou te le pule atu, lau Afioga i le Minisita o lena e i ina le faitalia. A o le matou tatalo alofa mai i le matou itumalo, alofa mai. E pei lava ona ou fai atu, o lo o taumafai le matou galuega, ua uma le matou fale, ae i ai lava nai vaega o lo o fia faaleleia, ia ma le matou komiti o le a 6 masina e le i maua ni totogi. O la foi e faatali matou ofisa, ona o la e le i mautu le faasalalauina o isi matou avanoa. A o upu tuusao, tatalo atu lau Afioga i le Minisita, atonu ua soalaupule ma le afioga i le Minisita, faamalamalama ia tulaga ia. E le mafai le mafai ona faia e au nei ma le komiti se faaiuga o tulaga ia, leaga o lo o taoto le nuu ma lona finagalo. O le tatalo atu lena i lau Afioga. A fai lava e talafeagai, e matou te taumulimuli lava. Ua matou maua le tusi, ae o lo o taumafai mai e fia maua se feiloaiga. E pei o le faamatalaga lena lau Afioga i le Minisita. Ae lafo atu, le tagi a le pumate e valuvalusia aa o le laau.

O le poloketi lava ia o lea e le i faitauina lona faamanuiaga, ae pei o le seleni lea, o lea lava e manino e mo komiti ma nisi tulaga o le ofisa, o le pili o le eletise ma le vai. Ae o le tulaga lava ia o le poloketi, atonu e i ai se taimi. Ae o le tulaga i le tatalo atu lena ma le faaaloalo, ia la outou faaso, se i silasila ane i ai i ia tulaga. Lau afioga i le Fofoga Fetalai e le faaloaloavale so matou leo, e le faamatafauloaina foi se matou tala.

**Susuga Hon Laauli Leuatea Polataivao Fosi:** Lau Afioga i le Fofoga Fetalai, sina minute lava...

**FOFOGA FETATALAI:** Se i saunoa mai lau afioga i le Minisita o Faatoaga ma Faiga Faiva.

**Susuga Hon Laauli Leuatea Polataivao Fosi:** E agai mai le saunoaga a le Afioga i le sui usufono i lau upu na fai. O au nei o le sui o le komiti, steering committee, e le o i inei le Afioga i le Minisita, o lea ua tauave e le Afioga i le Minisita o Tupe le matou galuega. O le fesoasoani lea e avatu Aiono, o le fesoasoani e alu ai i luma la outou poloketi. E tatau ona e

silafia le mea lea e tupu i le tou poloketi. O lea e taatitia i le Matagaluega tusi a lau komiti na aumai, o i lea na mafua ai ona toa le tou mataupu. O mea foi ia matou te tolaulauina atu, o faaiuga a le komiti suesue lea e i totonu o le tatou Matagaluega, e afua ai le toalia lea e i ai la outou mataupu. O le tali lau afioga i le sui usufono, o lena e i ou aao le soalaupuleina o la outou komiti. O le tali lena o lea e taumafai, o lea foi na momoli atu i lenei taeao atoa. E fai le avanoa, fesootai ma le Matagaluega soaluapule atugaluga o la outou komiti. O lau sui taitaifono ua faatea ma le komiti, tulou lava lou saunoa mai faapea, e le feaiaa'i le tulaga o faaiuga a le nuu ma le komiti, Aiono o lena e i ina le tofa i lau Afioga e faafilemu ai le mataupu. O le faaiuga na fai, e taitaifono lau afioga, ae sui taitaifono le na alu i le palota a le FAST, o le ala lea o le fesootai atu, leaga e tele, e le falala fua le niu, o upu ma tala ia ua tatou faalogo ai i le Maota, a o upu foi ma tala ia e fai i lau komiti, na ona avatu lava o le tupe tufa loa. E na ona ou faapena atu, o le saunoaga lena, o le atugaluga a lau sui taitaifono, ua aveese ma lau komiti i nisi aiaiga le talafeagai ona o ni mataupu faalenuu, ae ua aafia ai lona avanoa, e saofai ai e faaleo lona lagona i mataupu a le komiti.

O le ala lea o lou toe apaapa atu, o lena e i ina le tofa i lau afioga i le sui usufono. Ia agai mai i le tulaga o le komiti ma le tatou fonofaavae lea e i totonu o le Matagaluega e soalaupule, ma tali mai i le tusi lea na avatu e le Minisita. E pei foi o le tusi lea sa ou talosaga ai i le sui usufono o Safata, e aumai le tali aloaia ona faaminoi lea i luma o le tatou mataupu ma manino ai faiga faavae o atugaluga lea. E le soona taofia se mea e tasi e pei ona matou fai atu, e ala ona taofi, ina ia tatou mulimuli i faiga faavae ma mea, ina ia filemu le komiti ma sao le sagatonu o le faavae e alu ai tupe, o se fesoasoani lea ma lou faaloalo.

**FOFOGA FETALAI:** E talitonu o lea ua manino le saunoaga ma le faamalamalama a le afioga i le Minisita aemaise o le tatou poloketi. Tulai maia lau Afioga ua maea lou taimi.

**Afioga AIONO TILE GAFA:** Faafetai i lau Afioga i le Fofoga Fetalai. E faafetai atu i lau afioga i le Minisita, o lea ua e saunoa ma faamalamalama tulaga ia. Ou te teena le finagalo lea lau afioga i le Minisita, e faapea ua i ai le finagalo o le itumalo e tufa le tupe. Ou te le iloa po o fea e sau ai lea faaupuga. E pei lava ona ou talanoa atu, o le mea e fai e le Malo e lagolago ai lenei itumalo, leaga e tasi lava le nuu. E pei ona ou fai atu, e leai se FAST leai se HRPP, ae omai sui o le komiti, e fai le galuega aua le itumalo ma le manuia. A o se upu faapea o le avatu o le tupe ona fuafua lea e tufa, lau Afioga i le Minisita ua ou leai atu i se tulaga lea. O lea lava matou te taumafai...

**Susuga Hon Laauli Leuatea Polataivao Fosi:** Ioe lau afioga i le Fofoga Fetalai. O le a ta le fai i lau lau afioga i le sui usufono, leaga o le fofoga lava o lau sui taitaifono, lea na oomai i le ofisa ma faaleo lagona ia. E le o ni upu la a au lea ou te fai atu i le taimi lenei. O lea na ou fai atu, fofu alamea la outou mataupu, o lena e afio Lolomatauama o tapaaui foi e te tautasi, a o si au lena fesoasoani atu. E le o se upu a au le upu lea, o le upu a le sa i ai i lau komiti ma lau sui taitaifono, o saunoaga ia na oo mai i le matou Komiti la matou komiti faafoe. Ina ne i e matau mai ua matou apotala, lau Afioaga i le Laau na Fausia, o le lagona lena. O sui lava o lau komiti ma lau sui taitaifono, lea na ala ai ona tusi, aumai lana tusi aloaia e faamalamalama ia Leota, taofi le poloketi ona o atugaluga ia. Lea na fai atu le Minisita, e tali mai i le tusi lea, o si au toe tulai atu lea ma le faaaloalo.

**FOFOGA FETALAI:** Ou te masalo lau afioga i le sui usufono mamalu o lea ua manino lea tulaga faatasi ai foi ma le fautuaga a le Minisita, o le a lafo atu i lau Afioaga. O lau afioga lava o le a maua ai le toamalie ma le filemu o lau komiti ma le paia o la outou afioaga. Saunoa maia lau afioga i le sui usufono mamalu.

**Afioga AIONO TILE GAFA:** Faafetai lava i lau Afioaga i le lavapapale i lau Afioaga i le Fofoga Fetalai. O le a le toe tali atu i le finagalo o le Minisita, ae ou te iloa lafo maia, se i... e pau lava le tulaga e popole i ai lou taofi, ona o tulaga faapea, i le faateaina o le sui, e leai la e le faia e le komiti. E toe ave lava i totonu o le nuu, o i ina e sau ai le tali, afai foi o le a le tulaga ua oo mai, ou te faamalulu atu, ae o le a faapena ona fai. Lau Afioaga i le Fofoga Fetalai, ua faafetai tele mo le avanoa o lena itumalo. Ia tau ina ia faamanuia le Atua i lau galuega e le faigofie, ia manuia foi le Maota, i la outou saofaiga i Minisita o le Kapenta lau Afioaga i le Sui Palemia, aemaise foi o le usugafono mamalu a le Palemene aemaise o le Taitai ma lena Talaga, aemaise o le paia o le tatou Maota, ia faamanuia le Atua i le tatou folauga i lena tausaga, faamanuia le tapuaiga a lou itumalo, aemaise Samoa o lo o faafofoga mai. Ia manuia faafetai.

**FOFOGA FETALAI:** Malo saunoa i lau afioga i le Laau na Fausia, le sui usufono mai Aana Alofi 3 malo faafetai. O le avanoa lena i se tasi o sui usufono mamalu.

O lea ua matau atu o lea ua fou mai le sa o Vaimauga 1, lau afioga i le sui usufono mamalu.

**Afioga SULAMANAIA FETAIAI TAUILILI TUIVASA (Vaimauga 1):** Ia faafetai i lau Afioaga i le Fofoga Fetalai mo le avanoa o lena itumalo. Ae le i faia se sao o lena itumalo e tusa ai ma le Tala Faaopopo o le tupe ua opea i le Maota, e muamua ona momoli atu le agaga faafetai o lena

itumalo i lau Afioga i le Fofoga Fetalai, ona o le tulaga lea ua ou nofo atua i nei. O lea ua sui lou nofoaga, ua lagona ai lo ta fiafia, aua a ta nofo loa i talaluma nei, o matou la o Minisita o le Itu Agai. Ae fiafia e faasilasila atu, o lea la ua ou Minisita, ae o lea e i tua lau Minisita Lagolago lea o Mauu.

Lau Afioga i le Fofoga Fetalai, ae le i faia se sao e momoli le agaga faafetai ma faatalofa atu i lau Afioga i le Fofoga Fetalai i lenei tausaga fou. E momoli ai le agaga faafetai ona o le tele o taimi sa tatou... e le i feiloai ai. O le fono muamua lenei o lenei tausaga fou.

**Tofa Mauu Siaosi Puepuemai (Vaa o Fonoti):** Lau Afioga i le Fofoga Fetalai pe maua se avanoa.

**FOFOGA FETALAI:** Ia malie ia lau Afioga i le sui usufono mamalu, o le fua foi lena o lou tusi fua i tua i le sui usufono o le Vaa o Fonoti. Se i tulai mai lau Afioga i le sui usufono mo le Vaa o Fonoti.

**Tofa Mauu Siaosi Puepuemai:** E leai se agaga e faalavelave i le saunoaga a le sui usufono mamalu, ae ua ou tulai atu leaga o lea ua taua foi ia lou igoa, silafia foi e lau Afioga a le Fofoga Fetalai, so o se failauga lava e pito i luma, a tu la i le tootoo, e tu lava o la e lilia. E faamoemoe la i lana tulafale lea e i tua, e avatu le tuualalo e manuia ai lana lauga. O le mea la lea, Tuisamau manuia lau lauga i lenei vaega o le aso.

**FOFOGA FETALAI:** Faafetai, tulai maia le sui usufono mamalu.

**Afioga SULAMANAIA FETAIAI TAUILIILI TUIVASA:** E faatalofa atu ma ofo alofa atu lenei itumalo. I le afio a lau Afioga i le Fofoga Fetalai e tusa ai ma le taitaiga o le fonousu a le atunuu. E meeme lava le agaga ma le faafetai i le tausaga ua tuanai. O le fono muamua lenei i lenei tausaga, o lo o maualuga lava le taitaiga a lau afioga ma le fesoasoani a le Afioga a le Sui Fofoga Fetalai. Malo mo le faafoeina o le sa o le atunuu. E faatalofa atu foi i lena Itu o le Maota, e ui ina e le o afio mai le Afioga i le Palemia, ae masalo o faalogologo mai, ia agalelei le Atua, i siiga gasegase foi, ia taulu taulu vave ona toe foi mai e tusa ai ma le valaauina foi e taitaina si o tatou Malo.

E faatalofa atu foi i afioga i Alii ma Tamaitai Minisita o le Kapeneta malo, aemaise foi o nisi o Minisita o afio atu foi i fafo i ni fonotaga aemaise foi o siiga gasegase, ia alofa le Atua ma toe faafoisia le malosi e toe foi mai.

Liliu mai foi i lenei Itu, e faatalofa atu foi i le Sui Taitai o le Itu Agai, aemaise foi o le afio o tamaitai ma alii sui usufono o le Palemene o Samoa.

E faatalofa atu foi i lau susuga i le Failautusi, aemaise o lou sui lagolago aemaise o le Ofisa o le Fono o lo o faatautaia ma tautuaina le fonousu a le

atunuu, malo le galulue. E le mafai foi ona alu e le i faatalofa lenei itumalo a le Vaimauga i le afifio o Ofisa Sili o Pulega o Matagaluega a le Malo ma Faalapotopotoga Tumaoti. O outou e lima ma vae i ai lenei Palemene.

E le mafai foi ona alu lenei sa e le i faatalofa foi i Ofisa faasalalau, o outou o lo o faasalalauina lenei fono i nusipepa ma alaleo i atunuu mamao, aemaise o si o tatou atunuu, ia faafetai foi i la outou pitolaau.

E faatalofa foi i le afio o le afioga i Le Ao Mamalu o le Malo ma le Masiofo. E le gata foi i lea o le afio o le Sui o le Fono o Sui Tofia ma le Masiofo, aemaise o le afio o le Afioga i le Faamasino Sili, aemaise o le Peresetene o le Faamasinoga, ma afioga i Alii ma Tamaitai o le Faamasinoga i itu e lua ma le paia o le faamasinoga. E le i alu le sa o lenei itumalo, si ou itumalo o Vaimauga, ia tapuai mai, faamanuia atu le tausaga fou o le fono muamua lenei o lenei tausaga. E manaomia lau tatalo e tusa ai ma le usugafono a lo tatou sui usufono.

Ae momoli le agaga faafetai, o le a ou talanoa muamua i le Tala Faaopoopo ua opea i le Maota. E momoli le agaga faafetai i lau Afioga i le Minisita o Tupe e tusa ai ma le Tala Faaopoopo muamua ua tuuina mai i le Laulau-a-Fono. E lagolagoina ma momoli ai le agaga faafetai o lenei itumalo. Ua vaai foi ma silasila totoa foi le Maota, i tulaga ua aumai, o nai fesuiaiga lava. E matau foi ua i ai nai faamanuiaga i tulaga foi o penisione aemaise foi o e e le o atoatoa le malosi o le tino ma le mafaufau, ia faafetai. Ae o le tuualalo lava ia a lenei itumalo, o lea ua faamanuiaina, e le faapea e faatauagavale ia tatou, lea na i ai faamanuiaga i tulaga ia i penisione a nai o tatou tama ma tina matutua.

Ae o le popolega a lou sui usufono lau Afioga i le Fofoga Fetalai, e le i i ai lava se mea ua faia i le public services i le tulaga i le public services o e o lo o tautuaina lo tatou Malo. Sa ou manatu lava e i ai se tulaga, se pasene aua o lea e matau atu, 21, 22 e leai lava se mea ua faia, se siitaga po o se ponesi e tau ai le galulue a le aufaigaluega a le malo o lo o tua i ai tatou. Ae o lea foi ua toe aumai faamanuiaga ia i o tatou tina, ma e e le atoatoa malosi o le tino, ia e faapena se lagona. Ae e i ai foi le manatu o lenei itumalo, o le supplementary, e na o ni mea e le i mafai ona vaai i ai i le taimi lena, faataitaiga ua le lava le tupe e ave ai ni tagata i fafo e mamai, ae o lea ua aumai ai faamanuiaga ia i tulaga lea. E pei e faapena le vaai a lenei sui usufono. E tatalo i lau afioga ma le Tamaitai Minisita, ma le afioga i le Taitaifono o tatou tupe, se i silasila ane i le public service ina ia mafai ona i ai se faamanuiaga o lo o tautua pea ma atinae si o tatou atunuu.

O le tulaga ua i ai Samoa i le taimi lenei ua taugata le soifuaga tulou lava le paia o le Maota lenei. O le agaga la lena o lea sa ou manao i ai, i nai faamanuiaga i service a le Malo. Ua maua le faasalalauga a le PSC ina ia freeze uma avanoa, e amata mai i le Principal level e alu ifo i le Officer level. O le popolega a lou sui usufono, o totonu o Matagaluega a le Malo o lo o auauna pea, ua leva ona look forward le isi o le a faamavae le principal

pe ua ritaea foi pe ua manuia foi i le... ae see atu ai le isi, a o lea ua sau le tulaga i le PSC e lagona ai lava le faanoanoa. Ona e pei e foliga mai, e pei o la o le a toe restructure po o le a le silasila, ae o o tatou lava tagata. O le mea lea e manaomia, ia tele galuega, e faatutumu avanoa o lo o i ai. ma toe create nisi galuega fou. O ai e tua i ai? E tua i ai lo tatou atunuu. Ae o le popolega lena o lou nei sui, o lea ua omai nei si au fanau ua foi mai fafo i aoaoga. E tolu masina o ave application ae alu atu loa ma le tulaga lea, ua lagona ai lava le faanoanoa. O le isi o tulaga, ua toe fia foi ai tamaiti i fafo, ae sa ave e le Malo i fafo, e tataua ona omai e serve le bond, e tataua ona serve si o tatou atunuu. Ae o le a la le mea lea ua i ai? E le iloa foi, o le fesili foi lena a lenei itumalo. O a fea lea process e fai o le a freeze ai galuega a le Malo? e tua i ai o tatou tagata, aemaise o le tulaga se i toe iloilo. E pau le mea lea e manao ai lenei itumalo, toe fai nisi galuega, faatutumu avanoa e lei faatutumuina, ma toe create nisi galuega fou e tua i ai o tatou tagata, o le tatalo lena a lenei itumalo i le afioga i le Tamaitai Minisita. O le tulaga foi ua toatele lava sui usufono na saunoa foi i le tulaga lea i le business license, e sao lelei. O le popolega a lou sui usufono, ina ua o atu lo matou itumalo, manatua e pei o le taimi lea i le laisene e pei e renew le business licence ia Tesema. Fai mai ua i ai le isi mea fou ua i ai, sa nofonofu lava ma fai i ai, e o pea e tulituliloa. Ae o lea ua manino le saunoaga a le afioga i le Minisita i lenei taeao, e tau lagona ai le faanoanoa. E pei o le process lea na fai e le Faigamalo ua tuanai, ina ia faafaigofie ona issue business licenses, ina ia tasi lava se mea, aua o le tulaga sa i ai le faamatuuina atu o laisene.

A e sau e fai sau laisene, e te alu i le falemai, omai e fai le survey, e te alu i le fuimu, e te alu i le Land and Title po o ua faasalalau le lisi o lau pisinisi. A o le mea o lea e naunau, ina ia mafai ona faavave, e pei o nai tagata o tatou aiga mai fafo e fai se faleoloa e tuu i ai tatou. E uma ifo lava le masina e le i faia lava. E pei o le agaga lena sa fai ai e le Faigamalo ua tuanai, se faiga ia mafai ona tasi a, e pau lava le mea o le tulaga i le MCIL ia aumai le approval i ina, o tagata ia o le a issue i ai le...o tagata mai fafo. Saunoa foi nisi o lena itu i lenei taeao i le tulaga i o tatou tagata i fafo, e leai o le MCIL ma le Ofisa o le Palemia, o latou na e issue ina pemita faigaluega e omai ai tagata. Ona omai lea, lesitala i le MCIL faatoa ave i o i le Matagaluega o Tupe Maua ina ia mafai ona issue le laisene o lea ua i ai le faatagaga e omai i totonu o si o tatou atunuu e fai pisinisi, a uma a e faapena. Ae pei o le lagona lea ua tau popole ai, aemaise o lea e manaomia e tatou tupe, aemaise o tatou o le laisene e manaomia ia tatou vaai atu.... E pei ona ou fai atu e ese le pele ia te au o le Matagaluega lenei, ona sa ou galue ai. O i lea e tua i ai, po o le ivasefulu pasene o le Tala Faatatau o le Tupe ma mea uma, e tua i le Matagaluega. O le a la le tulaga ae uma lava lenei masina, e le i omai lava latou nei e faafou laisene. Ae o le agaga lea e taumafai atua i lau Afioaga i le Fofoga Fetalai, faafaigofie mea i o tatou

tagata, faafaigofie le sau o le tina mai tua, a o lea na saunoa le Minisita o le Tiute, fai mai e leai ni process na ona omai lava fai...e leai, sa ou i ai. E omai faatumu le form, e le mafai ona toe faafouina lou laisene, pe a i ai ni aitalafu i lalo o lou suafa, po o lau pisinisi. Ona fai loa lea i le taimi lea le arrangement, ina ia mafai ona e sau e totogi le lafoga, pe ete sau e fai se outstanding returns, o a uma mea, i le taimi lea. Ae tau faanoanoa ai i le tuuaiga lea fai mai e leai ni procee ma ni, e leai e le faapena le faiga, o la sa i ai lava. Ae o le tatalo lenei lau Afioga i le Minisita, se i silasila ane, faafaigofie mea i o tatou tagata. aua ne i o tatou faafaigataina ina... o le taugata o le soifuaga lea, o le popolega lea e i ai i lou sui usufono, ina ne i alu alu leai se mea e tua i ai le afaigaluega a le malo, ae faafetai lava i le Minisita o Tupe i lou vaai atu i le Tala Faaopoopo, e na o le toe fesui ai lava o mea i le la itu, e leai lava se isi mea o la e i totonu. O le agaga fiafia lenei ma le lagolagoina i le tulaga i le tala faaopoopo.

I le tulaga lau Afioga i le Fofoga Fetalai, i le miliona, o lenei foi itumalo o lo o faalogologo mai. E leai se tala, e masalo o le itumalo muamua lenei na fai loa le fuafuaga lea, aumai loa i totonu le tala o le tupe. Na matou o sue le okika, ona o le itumalo lenei, e tele ia qualify Auditors e iai, aua e atamamai. Ae na matou lava ona o le tala a le ofisa, aua le aumaia ia a outou accountant ae aumai se tagata ese. O lea la na alu ai le tupe i le totogiina o le isi suetusi lea, ma aumai loa i totonu, ma faagaioi ai fuafuaga a le itumalo. Tender le fale malo le konekarate ma faatino loa, ma aumai faafou le falekomiti a le isi afioaga ma amata ai loa. O le itumalo foi lenei na muamua faafaigaluega loa le toatolu. E oo mai i le taimi lenei, ua leai ma se totogi o nai tamalii ia e toatolu.

O lau tuualalo i lau Afioga i le augafaapae po o le tamaitai o le Maota o lo o tulai i le tufatufaina o seleni ma le tamaoaiga. O le tuualalo, pe mafai ona amata le tala o le tupe lea o le a tatou i ai nei. Aumai le toatolu lea i lalo o le paketi a Tina ma Tamaitai ina ia aua ai nei... aua o le miliona lea e avatu... o le tulaga e i ai, e avatu toe fai ai totogi o laia, o aulauni, e lelei lava na o alauni o le 14 lea. Ae o lau ia tatalo, e lelei le aumai o le toatolu lea ua faafaigaluega, i lalo o le paketi o Tina ma Tamaitai. E lelei foi e o atu e control atu, o atu e asiasi atu o a latou mea o fai, ma o atu e submit mai i le Ofisa. Aua o le popolega lenei, aua e toe alu uma lava le tupe, e toe totogi ai foi le toatolu lea, ae o le popolega lenei, o tagata faigaluega lava. O le tulaga la e i ai, ua o le matou komiti e tausaili mai ni seleni e totogi ai le staff lea, ona e mataga ae vaai mai le itumalo, o tamalii foi, ae te i ua toe o atu i aiga. Ae o le tatalo i lau Afioga i le Minisita o Tupe, silasila ane i lenei itumalo.

Ou te faafetai foi i le Minisita o Siosiomaga, faafetai mo le faamatuuina mai o fanua. O le tulaga lenei na tuai ai ona faatino le matou galuega, sa faatalitali i le tulaga o le fanua. Ua aumai la le fanua, o lo o faatino pea le tulaga i le fuafuaina e le afaigaluega a le Minisita, a ioe loa le tulaga lea,



ona faatino loa lea o le fale o le itumalo, ae tatalo atu i lau Afioga i le Minisita o Tupe, pe mafai ona aumai muamua le \$150,000 se i fai ai totogi o le aufaigaluega, aemaise nai komiti ona e tautuaina lava le sui usufono faapea ua alu uma le \$200,000 lea i totonu, e leai. Na avatu loa le \$200,000, faagafua loa i alauni o komiti ia e sefulufa. O isi na amata ai loa ma faafaigaluega ai loa le toatolu lea.

Lau Afioga i le Fofoga Fetalai, e leai ni mea se tele, faafetai i lau Afioga i le Minisita o Felauaiga po o le LTA, o lea ua talia le talosaga foi a lenei itumalo ia Fagalii, ae tatalo i le tatou auala lena i Fagalii, pe mafai ona o atu, ua matuai malepe lava le agai i uta lau Afioga i le Minisita, pe mafai ona toe asia, aemaise foi lenei taimi i le louloua o le tau. O le ta auala lea i le va o Fagalii ma Maugafiafia, o i ina lea e pei e access uma atu ai tagata pe a pisi tai, pe mafai ona fai se tulaga i le auala laupapa lena, le auala lea e alu atu i lalo i Fagalii, ina ia faafaigofie ai le femalagaaiga a le atunuu. O lea foi o le a toe ae le aoga a le Samoa Primary, e o atu uma ai lava le paia o le atunuu e avatu a latou fanau i ina, i le auala lea.

E toe tuuina atu ai foi le ta taligalu lau afioga i le Minisita, po o le Afioga i le Minisita o le MNRE po o fea lava e vave ai le tulaga i le taligalu. E pei ona saunoa le sui usufono o Safata, na approved i le tausaga lea ma le Paeaiga ua tuanai i le auala o lenei itumalo i le taligalu. E oo mai i le taimi lenei na ona toe silasila ane, po o fea le faiga faavae e vave, pe vave le MNRE aua o le tulaga lava ia i le taligalu, aemaise le nuu lea o Lauili, o lena ua outou silasila pe a outou afifio atu ai e leai se aau, e moana atoa le mea, e fati lava galu i tua o tua maota. O popolega lena a lou sui usufono, ona e le gata i le fafati mai o galu, ae o le sau foi le vai ia i uta, ua le iloa e si ou itumalo ma le nuu lea o Lauili po o fea a agai i ai.

E momoli le agaga faafetai i le afioga Minisita o le Falemai. E matau lava ma le totoa le tulaga o lenei Minisita e pei ona ou fai atu o le aulelei ia o le Minisita lea i lau vaai. E ese le... ae o le tulaga i le falemai, pau lava le tuualalo i lau afioga i le Minisita ia fai ma update mai e outou le atunuu ia po o ua fia e ua gasegase sui, aemaise foi tala mai atunuu mamao ua toe i i le isi galu ia aea Samoa, e le mafai leaga ua uma ona kava outou i le mana o le toto o le faatuatua i le Atua i mea sa faia e nai o outou tuua e faavae ai lo outou maota lenei.

Ia o le tuualalo lena a lenei itumalo. Lau afioga i le Minisita o le Soifua Maloloina, silasila ane pei o le a faafetai i le Minsita o le MNRE ua faamatuu mai le eleele mo le matou itumalo.

O le isi vaega ua faamatuu i leoleo ia ae pe mafai ona toe fai ai ma se lala o le falemai lau afioga le Minisita aulelei i i i le reserve lea a le MNRE ina ia mafai aua nei toe agai mai le Vaimauga i i i le falemai i Motootua ae omai a omai, ma tua foi i Atua omai a i i i Vaimauga Nu.1 e faigofie ona toe agai i tua i le reserve lea pule ai le Minista o le MNRE.

E momoli foi le agaga faafetai i le Minisita o Aoga, lagona a le faafetai i tulaga i nai asiasi aoga ma sa ou lauga ai foi, ia e lagona a le faafetai. A o le tuualalo a lenei itumalo i lau Afioga i le Minisita o nai tamaiti ia e o i fafo, lea e uma tulaga foi na lea i le UPY ona o le process na e fai o le faigata ia seiloga e apalai le tamaitiiti ia faatoa mafai lea ona alu i fafo. Ae ta te tatalo atu lava ma avatu le tuualalo pe le mafai ona aumai pea result a tamaiti ia i gauta i le UPY, a maualuluga ona ave lea ae o le mea tusa a pe aumai le result i o le UPY e pasi lou alo ae a le apalai i sikolasipi ia, e le mafai ona faamanuiaina.

O le uiga a lea o la'u tatalo lau afioga i le Minisita se i toe silasila i lena vaega ina ia faafaigofie ia faiga ia apalai ai nai alo ma fanau mai le NUS ia e uma ifo le NUS omai tamaiti pei ua le mafai e latou ona o i luga po o ua due foi le taimi lea e resitala ai mo avanoa faasikolasipi ia, ae omai ae fai mai e leai o le process a Niu Sila po o Ausetalia e tatau ona apalai ae pei o outou o lo o iinei e faafaigofie tulaga.

O bond a tamaiti ia e pei o le agaga lea na ta fai atu ai le iloa po o toe faamamalu a lena tulaga. O le agaga o lou nei sui o alo ma fanau na o i fafo e tatau ona toe omai, pei o le taimi lenei lea ua toe omai alo ma fanau na o i fafo a lea ua omai ua leai ni galuega. E le iloa po o le a le taimi pe 3 masina pau la le mea lea ua oo i tamaiti o le toe fia o i fafo. Aisea? Lea na o e aoga a o lea ua omai ua freeze. E le iloa la po o le a le taimi po o le a le umi lea e freeze ai.

E pei la o le tuualalo a lenei itumalo se i silasila ane, aemaise e sau le level principal pei ona ou fai atu e galulue a le afaigaluega i le public services ina ia mafai foi ona o ese isi ae look forward a e o i luga e fia o i luga i avanoa ia, ae maua o isi foi avanoa ua uma ona faatalatalanoa ia lea a e lei faatumuina po o ua uma foi ona appoint a o lea ua sau ma le faaiuga lea. O le tulaga lena e tau faanoanoa ai ona o lea e sau pei e sau mai lalo o le PSC, ia ae i ai lo'u nei talitonuga, o le a le malosiaga o le PSC e freeze ai avanoa? O le malosiaga o loo i ina i le Kapeneta, e pule le Kapeneta i tulaga i avanoa ma mea faapena, a o lea ua sau i le PSC ua freeze, sau i lalo o le public service. O lea e lagona ai le faanoanoa lau afioga i le Fofoga Fetai, se i silasila ane pei o lenei itumalo. E faamalulu pe a paopapa avatu mea i ina a lelei, lelei la outou Paeaiga lea ua i i, o lea e matau a i lenei Paeaiga o lo o faamanuia lava le Atua ia Samoa.

O lea foi na saunoa le isi sui usufono ua latalata foi lo outou taimi ae manaia outou e toe foi i tua sa outou vaai mai sa togi lata maa, sa ave le tuualalo pe paopapa ia toe faafoi mai.

Faafetai i lau afioga i le Minisita o Faatoaga, masalo o oe le isi e te naunau i le tamaoiga o le atunuu, ae faanoanoa i le taimi lea na sioki ai le aniani, si nei a tamai mea o le aniani pe le mafai ona fai le aniani e ola ia. Ae pei ua matananana le atunuu. Silasila ane pe leai se isi faiga ina ia mafai ona... pe aumai aniani e toto ma mea faapena.

Ia lau afioga i le Fofoga Fetalai, lau afioga i le Minisita o Faamasinoga, ia o ou mama na. Faafetai ua pasia le Tulafono ina ia vave ona faatino auaunaga a le Ofisa o Faamasinoga e sulufai i ai le atunuu, ona so o se Samoa lava e o a i le Ofisa o Faamasinoga i luga e o ai tagata solitulafono a o outou lava e oo i le pepe e le i fanau mai e fia o lava i lona faasinomaga ma lona tupuaga, e fia iloa le mea na sau mai ai.

Lau afioga i le Fofoga Fetalai, pau na o nai manatu o lenei itumalo, e faamalulu atu lava pe a paopapa toe foi mai lava i le sui o le Vaimauga, a o le sui Amiko lea, manuia lo outou alofaiva i le tou Faamasinoga, ua matua top top a outou. Ina ua ou alu atu e aumai si a'u fanau fai mai le isi loomatua ia te a'u, lau afioga i le sui usufono, o oe foi o Sulamanaia ou fai atu ai i i, Fai mai lea, le a le mea e te le faamavae ai ma le... Faiatu o le tama la ua salamo, faamavae faamavae la ua toe salamo. Manuia lau afioga i le Fofoga Fetalai ma le paia o lenei Maota.

**FOFOGA FETALAI:** Ia ua e taua fua ia Mauu ua toe tulai mai ai a lea ua faauma mai le saunoaga. Tulai maia lau afioga i le sui usufono mamalu o le Vaa o Fonoti aumai sou sao i le Tala Faatatau Faaopoopo o le Tupe.

**Tofa Mauu Siaosi Puepuemai:** Faafetai i lau Afioaga mo le avanoa, leaga o lea ua faaiuiu le saunoaga a le sui usufono mamalu faapea o le Vaega Faaupufai a le au Amiko, leaga o la e faafogafoga le atunuu. O au o le Taitai ae o matou o le Vaega Tutoatasi e tumau lava i le Palemene ma le faaaloalo lava .

**FOFOGA FETALAI:** Malo faafetai. Ia se i tulai mai, e agai i le itu lea a Amiko po o se isi mea?

**Afioga Masinalupe Makesi Masinalupe (Lefaga ma Faleaseela):** E agai i le sui usufono lea a Vaimauga 1. Sa faalogologo lava ma le totoa i le manaia ma le matagofie o le lafolafoga a le sui usufono, ae sa fia oo atu a se faamatalaga vaeatu le pau o le malu i le vaega lea o le \$1miliona lea sa taua. E na o sau fesoasoani leaga o a'u le isi tagata e molimau o le sui usufono lava lea na saunoa i le matou Komiti, o ia na tufa tupe ua tufa tupe o le latou... lea ua mafua ai ona vave ona uma le latou tupe la e molimau i ai, fai mai a ua tufa le matou tupe. Ia ailoga a toe avatu se tou tupe aua o lena ua e nofo ma tufa le tou tupe? Ua maua foi le tala afai o le fale komiti, ailoga e alu ai se \$20,000 i lona faatinoga? Ma le faaaloalo.

**FOFOGA FETALAI:** Ia lea ua maua atu e pei a e le i taua e le sui usufono mamalu lea tulaga.

**Afioga SULAMANAIA FETAIAI TAUILILI TUIVASA:** O le uiga o lou tulai atu leaga la ua agai mai le sui lea, ae pei o le sui usufono lenei ua 2 Paeaiga ua malamalama lelei i mea tau polokiki. O au tala lava faaulaula a o le sui leaga o lea e fou, lea la e pei e fou i le faalogo ae leai se mea o tupu, e malamalama le sui lea leaga sa faigaluega i le public service, e le mafai ona tufaina le tupe e alu i alafua pei ona ou fai atu ua uma ona ave i le ofisa o le Qualified Auditor, ua ave lana lipoti i i a o le sui usufono lea e le malamalama leaga ailoga na faigaluega i le public service.

E pei la o le agaga lena ou te tulai atu ai ma lou agaga faaaloalo, o lea faatoa tasi le Paeaiga. O le sui usufono lea o le Sui Sinia, vaai mai le mea lea ua ou nofo ai ua Sui Sinia i totonu o le Palemene.

**Afioga Masinalupe Makesi Masinalupe:** Lau afioga i le Fofoga Fetalai, se i avatu pea se faamatalaga. E moni lava e te polokiki ae o le mea sili ona taua o le matua e pepelo, o le pepelo le uiga o le mea lena. Ua uma ona e fai mai sao lava i le vaega lea, e moni foi a e fou le sui a o lea ou te toe fesili i le lumanai, e leai se mea faitau lou leva na e iai ma e malamalama leaga o lea matou te fai atu i tala sao sa e saunoa i ai. Ma le faaaloalo lava.

**FOFOGA FETALAI:** Ia ua i ai le manatu i lea tulaga po o ua manino atonu foi...

**Afioga SULAMANAIA FETAIAI TAUILILI TUIVASA:** E lelei le itumalo lenei o loo faaoga le fale komiti o le afioga i Letogo, lea foi ua approve mai e le Afioga i le Minisita le fanua o le MNRE, a o le sui usufono lea o la e fai lava i le fale i lona ia aiga. Fea la o i ai le faamaoni? Fai lava i lona aiga ma lona ia fale ma lona ia fanua le fale, ia ma le faaaloalo.

**FOFOGA FETALAI:** Ia o lea ua maua atu o lavea lau komiti i le 10 pe leai ?

**Afioga Masinalupe Makesi Masinalupe:** O la ua i totonu. E faamalulu atu foi o lea ua uma ona fai le matou feiloaiga ma lo matou itumalo aua e 8 nuu i le itumalo. O ia ou te iloa pe na o se 3, ae o le tulaga lena sa autasi ai lo matou itumalo e fai pea i le fale lea ua uma ona fai ua faatino lea foi ua faamalieina le vaega lea. Ma le faaaloalo.

**FOFOGA FETALAI:** O le mea sili ona taua o lea lava ua lua fesufiai foi a o lea maitau atu ia o lea e faamalieina lua finagalo o le mea lea o le a faaauau pea la oulua galuega malo le faasoia i lau afioga i le sui usufono mamalu.

**Afioga SULAMANAIA FETAIAI TAUILIILI TUIVASA:** Ia lea o le a faaiu atu le lauga a lenei itumalo i lau afioga, aua o lea ua uma le faauilavea a le sui usufono lea mai Lefaga.

Lau Afioga i le Fofoga Fetalai, a ua i ai foi se paopapa a lenei itumalo e pei ona ou fai atu lava o le agaga o lenei itumalo, ia lena itu moni e le o afio mai le Taitai a o lena e i ai lau afioga i le Minisita. E ta te naunau a ina ia see lo outou sa ina ia faatuatuanai mea ua tuanai.

O lea e matau atu o lea ua lalata foi le vaivaa i nai tausaga o totoe o lenei Paeaiga, ia outou maua le loto faamagalalo. E pei o le agaga lena o lenei itumalo, o outou a ia e fai a o lea e faalogologo le atunuu, o a foi tulaga i outou felafolafoaiga, pau lava le agaga i lau afioga i le Fofoga Fetalai ia manuia Samoa. O outou nei ua omai ia e i ai foi le taimi e toe agai ai tua. Ae pei o le agaga lena o lenei ia o lea o le a uma lenei Paeaiga ia o tatou o pea i le Faamasinoga.

E pei la e tuualalo atu ma avatu i ina i lena itu ia o a foi ni futia ua tuanai ia tatou lafoai i le Atua ina ia see pea le sa o Samoa, a o faalogologo le atunuu, atunuu e mamao ua tele o tagata o lo o faalogologo ma tapuaia mai lenei Fonousu. Ia ua i ai latou ua talitonuina ua i ai foi i latou ua faapena, ae o le agaga o le faanoanoa i lou sui usufono, tele foi o taimi e o atu ai i Niu Sila e vaai nai matua ma nai fanau, ia pei ua avea nei mea o Vaega Faaupufai ma mea ua feainai ai aiga, ua le mafai ona o isi aiga ua matua malepelepe a, ona o le a? Ona o le vaega faapena ma le vaega lea iinei.

Ia o lata ita tatalo, taunuu atu loa i o fai mai si au fanau, Dad la e fia vili mai lou kasegi foi lale la ua o le itu le la, fai atu ai fai ai e omai, omai e feiloai mai taatia na mea ae omai ma feiloai mai ma aumai se mea a le sui usufono. Manuia lau afioga i le Fofoga Fetalai ma toega o lenei Fono i lenei afiafi.

**FOFOGA FETALAI:** Ia malo faafetai, lea ua matau atu lea ua faasolo ina maea le tatou mataupu ma le Tala Faatatau Faaopoopo o le Tupe, aua e matau atu o le toatele o le itu lea o lo o i totonu o le Komiti, a o lea ua matau atu ua tulai mai le sui usufono mo Vaisigano Nu 1.

**Afioga NIUAVA ETI L MALOLO (Vaisigano Nu 1):** Lau afioga i le Fofoga Fetalai, e lelei foi le fai ma fesuisui ai musika aua foi le la pito ia lea foi ua maua ai se avanoa o lenei foi pito. Matou te fia tu atu foi e fai se sao o lenei usugafono i le tulaga i le Tala Faatatau Faaopoopo Muamua o le Tupe 2022/2023.

E muamua ona faatalofa, faafeiloai ma faamanuia foi le tausaga fou i lau Afioga i le Fofoga Fetalai, aemaise foi le Afioga i le Tamaitai Palemia e ui ina le nofoia le nofoa, lau Afioga foi i le Sui Palemia le o lo o tu foi i le foe e tauave le Faigamalo a o i ai foi i le sailiga manuia le Taitai. Faatalofa foi i Minisita o le Kapeneta aemaise foi le saofaiga i Minisita Lagolago.

E faatalofa i lau afioga i le Sui Taitai o le Itu Agai aemaise foi o sui usufono mamalu o le Palemene, itumalo e fia o e ua faapea ona tofofi e Itumalo e momoli foi le tofa ma le fautaga aua le tagamamanu a Samoa i le malae nei i Tiafau.

E faatalofa foi i le paia i le saofaiga o le aufaigaluega tofofi o le Atua o lo o faapea ona talafaauto i itu e fia o Samoa, e le gata i Samoa nei si o tatou atunuu, ia a o Samoa foi i atunuu mamao o lo o i ai, tama faasausau foi o le talalelei o le tatou atunuu ia faatalofa, malo le galulue, malo le tapuai tatalo i galuega fai a lau Palemene.

E fia faatalofa foi i le paia i le nofo a Ofisa Sili o Pulega o Matagaluega, o faapea ona pale mai i saofaiga i lenei vai tau. Matou tatalo ia i ai pea le manuia o le Atua i lo outou valaauina e tatou te limalima foi ma le tatou faigamalo ma le Palemene aua se manuia o Samoa.

E faafeiloai foi i le faafofoga tapuai a lo tatou atunuu. Le afio o le Afioaga i Le Ao o le Malo ma le Masiifo, afioaga foi i le Sui Tofia ma le Faletua, Faamasino Sili ma le Ofisa o Faamasinoga aemaise foi le Peresetene, ia e pei ona iai i na foi itu o le tatou galuega.

E faatalofa foi i lau susuga i le Ofisa Sili o Pulega po o le Susuga i le Failautusi ma le Matagaluega o le Fono, aemaise i latou uma o galulue aua le Fono usu a Samoa. E malie ia o le tusi faitau aso o le EFKS e pei ona iai mo le aso, o le manatu autu o le vaiaso lenei e tusa ai o le faasinoga a le tusi a le au faitau aso a le au faitau tusi paia a le lalolagi, o lo o i ai le autu o le amataga fou a o le autu o le aso lenei, ua matuai fiafia a le Atua ia te oe, God is very pleased with you, with us, ese le taua o le mea lea.

Lau Afioaga i le Fofoga Fetalai, e pei o le ala lea o le tulai foi ua lagona le fiafia, tulai le itumalo sei taumafai atu se lauga fiafia e lagolago ai le Tala Faatatau Faaopopo Muamua o le Tupe 2022/2023.

E faatalofa foi i si ou itumalo Vaisinago Nu.1 faapea ona taputapu mai Tia ma Tia Ituau, Falefaaea ma Faletagaloa, ia malo le tapuai tatalo. E ui lava ina faalogoina pea le malaga a le maliu ma le oti i isi o tatou Itumalo, nisi foi o Tama ma Tina matutua, o tupu foi ma ee e oo i tatou fanau ae manatu, e leai e le o se tofa na faafuafanua poo se tofa na faamatua i Saleaamua e faafutaga pe tafuafua e leai, o le tofa a na afua i le Atua, aua o le soifuaga tatou te momoe ma tofafa, feala ma alafai ae alu a le aluganoa nai Sataua, o le valaau paia a le Atua, o le maa e togi i le to. Ia tatou lototetele ia o loo i ai le faatulaga lena, o le Atua na te aumai na te toe aami foi pe a maea lana galuega, tapuai maia sei fai foi se sao o le tatou itumalo e tusa ai foi o le Tala Faatatau Faaopopo o le Tupe. E lagona le agaga faafetai, tuumumusu foi se agaga faafetai i lau afioga i le Tamaitai Minisita aemaise foi o le Matagaluega ma le Ofisa Sili aemaise foi o le Matagaluega e pei ona iai, e ui lava ina e le o se tala faatatau faaopopo tele, ae tatau lava ona iai se lagona foi e lagolago i le Tala Faatatau o le Tupe e pei ona ua i luma o le tatou Maota Fono, o le molimau a i mea na tutupu foi, e pei e

matau atu i le Matagaluega o Fesootaiga ma Faamatalaga Televavave ma Tekonolosi. E ui lava ina e le o iai le tatou Minisita, ia ae e i ai le tatou Minisita o lo o faapea ona ia tauaveina tofiga. Molimau a male agaga mautinoa i mea nei o coverage o service ia, o mea ia e lua o mea tau telefoni, molimau atu a lenei foi itumalo e lei masani ai ona o le slow, a ua matua leaga a le coverage i le matou itumalo o le vaitaimi ia na o, e iai a le pito o le itumalo lea o Sasina tulou foi le itumalo e iai a le spot e tasi iina e te oo mai ai loa faaletonu loa le service, a o le taamilo atoa i Salafai, e leai ma se faaetonu sa i ai i lena foi vaitau peitai le molimau a masalo foi e molimau le atunuu, faaletonu ia o auunaga ia na o na tuu atu i autafa, aua o lea e matau atu o le tele o le faaitiitia o nisi o pou faasalalau lea e i luga pei o le itu lea. O le agga foi la ona o lea alu ai tupe aua e tasi lea pisinisi pito sili ona tele le tupe e alu ai aua ua tofua a le tagata ma le telefoni, ia e leai a se tagata e faatau se card \$2 , \$5 e agai i luma e pei ona tuu atu lau afioga i le Minisita. Ou te talanoa leaga o lea ou te i totonu o le Matagaluega lea, ona o le tasi nei o vaega sa faavaatua ai galuega a le Komiti Faale-palemene, na ou fesiligia ai le Failautusi i le tulaga lea, i lou ia talitonuga o lea ua aumai le budget a le Matagaluega ae ou te le malamalama e toe tapena le PK e ave e approve mai ai pe a faapea e malaga le Matagaluega i le Komiti lenei i Salafai, se tasi foi o vaega sa tua iai nisi o fuafuaga a le Komiti. Pe ua le alagataua ona aumai le malosiaga lea e toe ave ai i tai ia le approve ina i totonu ina ia faalaititi le process ia ona faigofie foi lea o galuega a le Komiti.

**FOFOGA FETALAI:** Ia malie le sui mamalu sei tuu atu le avanoa i le Minisita o Faatoaga.

**Susuga Hon Laauli Leuatea Polataivao Fosi:** Matauina ua see ese le saunoaga a le sui mamalu i tulaga tau coverage, internet ona o a'u nei o loo tauaveina le tofiga o le Afioga i le Minisita o Fesootaiga, o ananafi na ou aamia ai le pule o le Dgicel ma le Vodafone, i le mataupu tonu a lea ua saunoa ai le sui. Sa ou aamia ai foi ma le Regulator ma le Ofisa Sili o le Matagaluega o Fesootaiga, ma ou te molimau atu o au le isi tagata na ou talosaga foi a o afio mai le afioga ia Toelupe e silasila i le tulaga lea. O le tulaga sao lava lau afioga i le Fofoga Fetalai, ou te faamaonia le mea lea e saunoa i ai le sui mamalu ua matua ese, uma le taimi na tatou iai le la tausaga ma ona tua ma lea ua o tatou i ai, ua faasolo ina ou fesiligia le tulaga lea, o le a le tele o iai le capacity o le tatou cable lea na fai ma sa sau le tali, e tele ma anoanoai o loo lava ma gafatia le capacity e mafai ai ona faasoa i le atunuu. O le fesili la lea e tulai nei lau afioga i le Fofoga Fetalai, service providers e lua o le Vodafone ma le Digicel, ua uma na ave i ai lau faatonuga ananafi e tuu mai sao se lipoti poo fea lea e poloka ai le mea aua o le mea lenei o le atoa o le mamafa ma le lelei o le cable ae le sao le

faasoasoina i le speed e tatau ona alu ai lea la tatou te molimauina uma lava i le taimi lenei i le toesea ai la o le afioga i le Minisita o Fesootaiga, ua ou manatu ua tatau ona fai, leaga o la e afio le afioga i le Minisita o loo iai le fonotele tau fesootaiga, o loo afio ai foi ma le Ofisa Sili o Pulega o le Matagaluega ma nisi foi o Faauluuluga o le tatou Matagaluega i mea lava tau fesootaiga, ae ua molimauina le tulaga o loo afio foi ma le tatou Regulator, o ia tonu e gafa ma vaaiga o le unsatisfactory o servive providers ia o loo service ina le atunuu, ma ou te faamaonia ma ua faataatia nei ou te momoli i luma o le Kapeneta po o fea tonu lea e iai mafuaaga nei o le tele o le cable ae small le usage pei o le saunoaga lea na saunoa ai Loau i le la foi nofoaiga, o le faamalamalamaga lea lau afioga i le Minisita Lagolago, ou te faamauina lou finagalo ae taatia mai o lea ua uma na fai le galuega ananafi sa valaau ai le Vodafone ma le Digicel e omai e tau mai le mea lea e tupu.

**FOFOGA FETALAI:** Malo faafetai lea ua manino lea tulaga, tulai mai lau afioga i le sui mamalu faaauau le saunoaga.

**Afioga NIUAVA ETI L MALOLO:** Faafetai i lau afioga i le Minisita mo le faamalamalamaina o nei vaega, ia o le tulaga la ona o le aafia o le lautele o le atunuu i vaega nei ae faafetai, e oo atu...lea na i ai le lagona na tau faafesili ona o lea sa tulai le Minisita o le Soifua Maloloina ma faamanino mai le vaega i le tulaga foi ia i visa, masalo o le a le toe tetele i ai se faamatalaga ona o le molimau a, e tagi ai foi le lagona ia o nisi foi o nei fanau, o si ou afafine sa malaga peitai e lei mafai ona agai fafo i Niu Sila ae ova atu ma le 18 itula na nofo ai i le malaevaalele, ae na tapena atu i inei le visa e oo ane a i le taimi e avatu e le mafai ona agai i fafo, o le tuutuu atu pea i autafa i le tatou aiga Kapeneta i le tulaga a nei o visa ua matua faigata. E i ai le tamalii foi o si matou nuu ua i fafo foi ona matua, ia ua maliu si ona tina iinei. O lea sa taumafai e ave i fafo e fai se visa, 7 lelei masina o loo apalai le visa e oo mai a i le aso, e le i maua se tali. Ia na o na tuu atu e fai ai le fuafuaga. Ona oo mai lea o se faamatalaga ia e masalo e molimauina faatoa ou vaai ai foi lea o a'u i ai, i le gataifale o le atunuu ae tutu, ae laina ai ni vaa oloa e omai totonu, molimauina o i a lea tau agai ai, faafetai tele i le afioga i le Minisita o Galuega, e ui foi ona o loo i ai le galulue faatasi ae tau a ona ave se lagona faafetai i le Ofisa Sili o Pulega o lo o galulue i lea Sector, malo le galulue, a o i tonu lea na laga ai se manatu o Vaisigano Nu.1 e faaoga ai lona uafu, ia mea nei o transshipment o containers e aumai ma oloa, aua talitonu ana ave i Asau ia masalo o lea ua taoto i luga, a o i tonu a lea na agai atu ai, lea la pei ua laina vaa ona ua pisi le uafu, ia manatu o lea ua tasi lea molimau maumaututu e faamaonia ai le mau a lenei itumalo mamao, o le mea e goto ai le la ia ae o loo i ai aseta tetele e mafai ona faatino ai ia vaega, ae faafetai tele. Momoli le agaga



faafetai i tulaga foi o feoaiga o vaa i taimi o aso fiafia, ou te molimau e faalua ona ou alu i le aso e tasi, e le atoa se 2 itula e ta te nofonofa ai i luga o le uafu, ua le toe maua foi se moe i luga o le uafu ia ona o le auunaga pei o le o taxi laupasese molimau le alu o vaa, faafetai mo le faatofalaiga, o le agaga faafetai, faafetai i Ofisa Sili o Pulega aemaise foi o le aufaigaluega i luga o le uafu aemaise foi o Kapeteni o vaa, ou te sau i le isi taimi e tuli mai le vaa o le 8:00 ae na sau le vaa i le 4:00 e toe taunuu atu le vaa i Savaii le vaa lapoa le Lady Samoa ae ta le 8.00. E momoli a le agaga faafetai i le afioga i le Minisita ma le tulaga foi i ia auunaga ona o le tautua i le atunuu, momoli le agaga faafetai, tatou te molimauina uma nai vaega ia, ae lau afioga i le Minisita o nai talosaga fou ia e avatu masalo o lena ua taulimaina e le afioga i le Ofisa Sili o Pulega o le Laualeele ma Felauaiga ia le auala lea o le matou faleaoga i le Kolisi i Asau, e lua ia faleaoga e alu i le auala lea e tasi, o le Kolisi ma le Aoga Tulaga Lua Asau Primary school, molimauina lau afioga o le auala e ta, ae a alu ai le taavale e le mafai ona savavali ai tamaiti aemaise o le taunuu atu tonu i le mea o i ai faleaoga, o le leaga ia. Faamolemole lau Afioga e ui lava ina ta militino faatasi, ae lelei lava le faafofoga mai o si o matou itumalo ua momoli lo latou manaoga e pei ona aumai e le sui usufono, aua o le mea lea na ala ai ona aumai le sui usufono e faaleo atu lagona i te'i ua ta tuu i le ta va nonofo, ae faapea le matou itumalo e le o logoina lau Afioga.

Ia, ona o si vaega lea o matou taligalu lau Afioga i le Minisita o le Siosiomaga, e momoli lava le agaga faafetai i le tusi foi a lenei itumalo na talosagaina ai se lisi, ia o lea ua maua le matou 10 eka o le lisi. E faamalulu atu i lau Afioga, e taunuu atu le tusi ua maea ona faatino le matou ofisa i nisi foi o fanua o le ekalesia. A o lo o tapena le poloketi a le matou itumalo e pei foi ona i ai talosaga i tulaga o mea nei o solar panels crate e faatino ai i totonu o le lisi lea. Ia na ona tatalo lava, o le tau o le lisi o la e avatu e \$2,000 i le tausaga, na ona oloolo pito o lou sa ma lou vaa, ae a pe a tuu ane i lalo i le \$200 i le tausaga, e fai si mamao o lenei itumalo e faatino ai ana poloketi, a lelei, ia ona toe foi uma mai lea o le ponesi i aao o lau Afioga ma le Matagaluega.

O le tulaga i le taligalu lau Afioga i le Minisita, o si ou nuu lea i Asau ma Auala, o Auala la i le mea o lo o i ai le malae kirikiti, e faafesagai tonu lava ma le ava le tulaga lea. Ia ua tele ina malaga i uta nisi o aiga pe a oo ina malosi le galu. E tatalo atu ai i lau Afioga, se i tautuana ane le talosaga a lenei itumalo, e pei ona faataoto atu i le Matagaluega.

Ia, o le vaega mulimuli o le lauga a lenei itumalo e fesoasoani foi ma faaopoopo i le Tala Faatatau Faaopoopo o le Tupe lau Afioga i le Minisita o Tupe. Masalo ou te manatuaina sa ou laga le mataupu lenei i le nofoaga o tane suauu. O lea ou te maitau atu o lo o i ai le tupe i le Tala Faatatau Faaopoopo lea, i se taimi ota malamalama ai. Ae afai o lea, malo le tofamamao.

Ae na ona ta fesili atu i le tulaga foi pei ona momoli atu ai le talosaga a lenei itumalo e pei ona e tali mai i le tulaga o pasi. Mo le silafia foi e lau Afioga, o le itumalo lenei e alu atu i Asau e tau i Falelima, e leai ni taavale. A oo ina... pei foi o le ala lea o le tatalo atu. Sa e saunoa mai i le tulaga e aumai se tupe e fai ai le tender, ia e leai se tupe a lenei itumalo. Na ona tatalo, ae a pe a faamatuu maia se pasi se tasi e tau amata ai, a alu alu foi ua lelei, ua toe faafoi mai lau pasi pe a ua maua se tupe e faatau ai se pasi fou a lenei itumalo.

Lau Afioga i le Fofoga Fetalai, ia o se lagona lea o lenei itumalo. A o le tulaga i le Tala Faatatau, malo le galulue. Faafetai i lau Afioga mo le avanoa ia manuia tele le paia o le tatou Fono, manuia foi Samoa ua faapea ona faafofoga mai. Soifua ma ia manuia.

**FOFOGA FETALAI:** Malo faafetai mo le sui usufono mamalu mai Vaisigano 1, malo foi le faasoa, aemaise foi o manaoga o lou itumalo, o lea ua faailoa manino i totonu o le Maota. Malo lava faafetai.

Ia, o lea e matau atu toe 5 minute fai le tatou malologa, o lo o lava a le avanoa mo se tasi o sui usufono ona toe faamaea lea pe a tatou foi mai le malologa.

Ia, ua i ai le manatu o le Nofoa, ia o le a fai se tatou malologa, se i toe taliu mai le tatou malologa ona faaauau lea. O lea ua maitau atu o lea ua sauni mai le sa lea o Tagaloatele. Ia ua manatu Tagaloa, o le a e saunoa pe a tatou taliu mai le tatou malologa.

O le mea lea, o le a faataatiaese Galuega a le Fono Aoaofaitulafono mo le tatou malologa o le afiafi.

*Na faataatiaese Taulumaga a le Fono Aoaofaitulafono i le itula e 4:39 i le afiafi ma toe amatalia i le itula e 5:20 i le afiafi.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoaofaitulafono. Faamalo le onosai i le tatou Maota.

E faataatiaese le tatou Galuega mo le malologa o le afiafi, ua tulai mai le sui usufono mo Sagaga 4.

O lea ou te tapa ma le agaga faaaloalo lau Afioga i le sui usufono mamalu e te tulai mai mo lau saunoaga.

**Afioga TAGALOATELE PASI POLOA (Sagaga 4):** Le paia o le Maota, i le afio o lau Afioga i le Fofoga Fetalai, afio foi le mamalu o le Sui Palemia, afio Minisita o le Kapeneta. E faafeiloai atu i le mamalu o le

tatou Maota nei. E faafeiloai atu foi i le la Itu o le Malu i le afio o le Sui Taitai faapea foi sui usufono o le Palemene.

E faapea foi ona faafeiloai i le mamalu o Ofisa Sili o Pulega o Matagaluega a le Malo ua tatou mafuta i lenei aso. Faamalo le usufono.

E faapea foi se lagona e faafeiloai i le afio o le tapuaiga a Le Ao Mamalu o le tatou Malo ma le Masiofo, le Sui Tofia ma le Faletua, le mamalu o le Tafatolu i le mamalu o le Faamasinoga, le Peresetene ma faauluuluga o le Faamasinoga.

I lenei ituaso lau Afioga i le Fofoga Fetalai, e i ai se lagona e faafeiloai atu ma fai foi se leo o Sagaga 4 i le Tala Faaopoopo o le Tupe mo lenei vaitau ua tatou o o i ai. E faafeiloai atu i lenei tausaga i le tatou Paeaiga.

E momoli lava le agaga o le faafetai i le tulaga ua i ai le tatou Fonotaga i lenei taeao seia oo mai i lenei taimi o le aso, faamalo i lau Afioga. O le tulaga foi ua e molia i lo tatou vatapuia ma lo tatou Tapaau i le Lagi, ia tatou ave lea i uta mo tatou i lenei aso.

A o le tulaga pei ona i ai lenei aso ma le taumafai atu o le sui usufono mo Sagaga 4, ia ave ia lenei taimi e faafeiloai atu ai i si ou itumalo pele Sagaga 4, i le afifio o Aiga ma Tapaau, afifio foi Tama Alosina, Alo o Malietoa, faapea foi le afio o le Toetaufanua, lea ua faalagi o le Siufanua i le afifio o Aiga. Faafetai i le tapuaiga Luatua ma lou Faletolu e tusa ma tulaga pei ona i ai le tatou va nonofo. Faafetai i le tapuaiga. Ou te lagona lava ua matagofie ma solosolo lelei la outou sui usufono ona o la outou tapuaiga pei ona i ai. Faafetai.

E faapea foi ona faafeiloai atu i le afifio o le aufaigaluega paia a le Atua i faafeagaiga tau i le lagi a Luatua ma Aiga mo la outou galuega faifaipea e manuia ai faiva o le itumalo ae faapea foi la outou sui usufono.

Lau Afioga i le Fofoga Fetalai, na ona faailo o se agaga faafetai o lenei itumalo i tulaga fai e pei ona i ai le tausaga ua tuanai atu, seia oo foi i le amataga o lenei tausaga. Faamalo le galue i lau Afioga. E tele faafitauli ma faigata na feagai ma lau Afioga i le tauaveina o le Nofoa o le tatou Palemene, ae faafetai le faapalepale, faafetai le onosai, faafetai le agaga o le taitaiga e taitai ai le tatou palemene e pei ona i ai lenei vaitau.

Faafetai foi i le afifio o Minisita ma le latou galuega fita e ui lava tatou te le o mafuta ma le Afioga i le Taitai o le tatou atunuu le Afioga i le Tamaitai Palemia, ae tatou te tatalo faatasi i le taitaiga a le tatou Tapaau i le lagi, sau se taimi sau se aso tatou toe feiloai ae faafoi ai le viiga i le Atua.

Ona o le itumalo o Sagaga 4 lau Afioga i le Fofoga Fetalai e le o se itumalo e tagisa, o le itumalo e toafilemu i taimi uma, o le ala foi lea e seasea outou silasila e tulai le sui usufono o Sagaga 4 ona e toa lelei lona itumalo.

O tulaga e pei ona i ai, se i ou amata atu ia i le vaega e pei ona i ai fuafuaga a le tatou Faigamalo e tusa ai ma le tatou tupe e pei ona lavasia i le tai \$1 miliona a le itumalo. Ou te lagona tasi lea fili o lo o taamilo i le

tatou atunuu i lenei vaiata i tulaga e i ai tala o le tatou \$1miliona e pei ona fuafuaina. I lo matou itumalo, o lo o toa lelei lava lau Afioga i le Fofoga Fetalai, e leai lava se mea o gase, e le tagisa foi. E i ai faafitauli o isi itumalo e tutusa foi ma si o matou itumalo, e tauave lava le saunoaga lea, faafofoga i le saunoaga a le Minisita ia Laauli, o le a tufa atu le tupe, pule outou, ae o le matagofie, ua leva ona tapena sui usufono toeiaina e i ai matou e tali faafesili ia. E sao lelei le Faigamalo, e aumai lava le tatou \$1 miliona, ae le aumaia la le \$1miliona e fai ai ni a tatou tifiga, e aumai le \$1 miliona e faaoga tatau. Ia ona uma ifo ai lava lea. O lona uiga, e lelei tele sui usufono toeiaina e mafai lava ona faatoafilemu lava i tua nai vaega faapea, ia ma le oo mai ai i totonu o le Palemene.

E momoli le agaga faafetai i a outou Afioga i Minisita, Minisita o Aoga, faafetai e tusa ma se suiga ua i ai le vaavaai a le tatou atunuu i le tulaga ua i ai le suiga o aoga. E pei foi ona taua e nisi o sui usufono ua tuana'i atu, ou te lagona lou mafanafana ona ua i ai se ua tofia e faalagolago i ai lau Afioga i le Minisita aua galuega fai a le tatou Ofisa o Aoga.

O le Vaega o Faamasinoga, faamalo faafetai, pei ona i ai. Ou te lagona o le fiafiaga sili lea, e leai se itumalo latou te le i lagonaina le agaga fiafia ina ua matala ia sega tulaga ua i ai le faamoemoe, ua faafaigofie ai foi ona fai fuafuaga a aiga, ia manuia tulaga e pei ona o o i ai le faasoasoaga o fuafuaga o le vaega o le Faamasinoga e pei ona i ai.

A o le tulaga o le Tala o le Tupe, faamalo faafetai i lau Afioga i le Minisita i fuafuaga lelei ua uma ona faataatia ma le faasoaina, e matua talia fiafia e sui o le matou itumalo lea faasoia ua o o i ai. Ae na o ni nai vaega e pei ona manatu e faailo i lenei itula a o maua pea e lenei sui usufono se avanoa lau Afioga i le Fofoga Fetalai. E le tagisa pei ona ou tau atu i le taimi ua sola Sagaga 4, ae na ona talosaga i le Afioga i le Minisita o Galuega Tetele, ia alofagia nai talosaga ua uma ona tuuina atu, ioe. O la e lava ua na o le gasolosolo mai o si ou pitonuu lea e faaafa atu le auala e alu agai i luga, po o fea se taimi o le a tafa ai le finagalo o le Afioga i le Minisita ma le Matagaluega, e le toe tele lava se mea o totoe ona au lea ma aliali mai le auala o si o matou pitonuu lea, o faafofoga mai ia Alamutu. O le upu lava a Alamutu, Tagaloa, a faata loa le matou auala lea, ua e faaipoipo lava ma le tofi o le tatou itumalo. Ia se i iloa lava la pe moni lea tulaga, o lou popole foi lea i ai.

A o tulaga pei ona i ai nai vaega laiti laia, ia e talosaga atu i lau Afioga i le Minisita o Galuega, se i e silasila i ai. O le tulaga foi pei ona i ai le talosaga a lenei itumalo mo se auala ina ia mafai ona ausia mai e le matou itumalo agai i le alafaalava o lo o i le isi itu o Aleisa ina ia faatutusa le matou itumalo ma...

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Ia malie le sui usufono mamalu mo Sagaga 4, se i tuu atu le avanoa i le Afioga i le Minisita mo Galuega Tetele.

**Tofa Hon Olo Fiti Afoa Vaai:** Ou te faamalulu atu lava i le Afioga i le sui usufono mamalu, ona ne i tuuaia foi le Pulega a le LTA i le tulaga o le auala faaafa. Ia e moni lau Afioga i le sui usufono mamalu i le tulaga lena, ae manatua foi, na fai atu lava le ta auala ina ia uma, peitai ane na taofia foi e le tatou nuu. Ia, o le mea la lena na faaafa ai, a o lena ua toe tatalo mai e toe fai, ia toe faatalitali mai mo le isi afa.

Ia e pei o lou toe tulai atu lena ne i te i ua faapea ua faimeaafa le LTA, e leai. E mafua lava ona o le finagalo foi o alii ma faipule e taofi ai le galuega. E lelei foi lena ua toe faamanatu atu ai foi, o nisi foi auala ae toe taofi e alii ma faipule, ia o le afa lava le mea e feiloai ma lena nuu. Ma le faaaloalo lava.

**FOFOGA FETALAI:** Ia, faafetai. Tulai mai lau Afioga i le sui usufono mamalu mo Sagaga 4.

**Afioga TAGALOATELE PASI POLOA:** Faafetai tele lava i le Afioga i le Minisita. Ou te lagona foi o se tali matagofie lea a o lo o faafofoga mai lea vaega o lou itumalo. Ioe. Ae faafetai o lea ua... Sa ou faapea ai ua teena e le Afioga i le Minisita sau faamatalaga o le afa auala, a o lea lava e ioe le Minisita, e sao o le afa auala lea na fai mo si ou pitonuu lea, a o lea o le a avatu le atoaga, ia pe masalo lava e le i oo ia Iuni ua maea atu lea vaega.

Ae i le agaga faafetai i le Afioga i le Minisita mo Falemai. E latalata tele au i le Minisita o le Falemai, ae pau lea o le Minisita e ese lou fefe ai, ae ou te faamoemoe o le a i ai se ma fetuunaiga ia aua ai ne i ou toe fefe i le Minisita lea. O le tele lava o taimi ou te fia vaai i ai, ae o lou atugaluga lena.

Ae faafetai tele mo galuega lelei lau Afioga i le Minisita o le Soifua Maloloina, e le tagisa lou itumalo, ua lava a nai falemai ia e latalata mai i Afega matou te siimai mai i ai ma matou o i Leulumoega, ia o lea foi e latalata Apia e faigofie ona e matou te mautinoa, e le o lava tele se seleni. Atonu lava na ona taatia atu, seia i ai se taimi e i ai se tofa i lau Afioga, ona faaau lea o ia tulaga e pei ona i ai.

Ia leaga o lea ua toesea la matou Minisita, ae o le Afioga ia Toeolesulusulu, Toeolesulusulu faafetai. Ne i te i ua faitau ane lau Afioga i le Minisita po o fea o i ai Minisita Lagolago a le tatou Matagaluega, ia, ae o lena e pei ona ou tau talai atu, o le a se mea e finagalo ai lau Afioga ua tauavea le tatou Matagaluega, ia o nei lava e lima ma vae aua le tatou galuega.

Lau Afioga i le Fofoga Fetalai, e pei lava ona ou tau talai atu i le taimi ua sola, e leai ni manaoga o lenei itumalo, na o le agaga o le lagolago. O a tulaga ua i ai le tatou faamoemoe ma tulaga e pei ona matau atu i le Tala Faaopopo o le Tupe mo lenei vaitau, e talia ma le fiafia e le matou itumalo. O lea o le a foi le matou faamatalaga, tau ina alofa le Atua i lau afioga, foi pea le agaga o le onosai ma le faapalepale, aua tulaga e pei ona i ai le taitaiga o le tatou Fonotaga. Ia faamanuia i le afioga i le Sui Palemia ma le mamalu i Minisita o le Kapeneta, manuia le Ofisa o le Fono faapea foi Ofisa sili o Pulega o Matagaluega, ae ola le leo o Sagaga 4, soifua.

**Susuga Maulolo Tavita Amosa (Sagaga 2):** Lau Afioga i le Fofoga Fetalai pe maua se avanoa faamolemole.

**FOFOGA FETALAI:** Ia se i tulai mai...

**Susuga Maulolo Tavita Amosa:** Manu e le i maea lelei le saunoaga, sa ou faatali se i maea, ona o lea sa taua le falemai i Afega, mo le fia faasaoina o lea tulaga, faafetai tele lava i lau Afioga i le sui usufono. Aua e tasi lena o mataupu, o lea o le a toe tuliloaina ai le afioga i le Minisita lea e te fefe i ai. Ua toe itiiti lava amata le tatou falemai i Afega, o le taimi nei e le o i ai se mea. Ma le faaloalo lava.

**FOFOGA FETALAI:** Malo faafetai foi le fesoasoani mai i le uso a sui usufono mo Sagaga 2. O lea e matau atu o lea ua fou mai le sa o Faleata 1, lau afioga i le sui usufono mamalu.

**Tofa MANULELEUA PALETASALA T. TOVALE (Faleata 1):** Faafetai i lau Afioga i le Fofoga Fetalai mo le avanoa. E muamua foi ona ou faatalofa atu i lau afioga i le Fofoga Fetalai. E faapea foi ona ou faatalofa atu i le Afioga i le Tamaitai Palemia, e ui ina tatou le faatasi, e manatu o lea o lo o faafofoga tapuai mai i atunuu mamao. Talosia ia i le alofa o le Atua, ina ia taulu taulu ma ia faafoisia lona malosia, ina ia vave ona tatou toe mafuta. E faapea foi ona ou faatalofa atu i le paia o le Kapeneta i Alii ma Tamaitai o le Kapeneta, faapea foi sui mamalu o lea Itu. Ou te faatalofa atu foi i le Sui Taitai o le la Itu o le Maota faapea foi sui usufono, e pei ona tatou mafuta i lenei aso. Ou te faatalofa atu foi i Ofisa Sili o Pulega o Matagaluega eseese a le Malo, faapea foi ia Pisinisi Tumaoti ua tatou mafuta i lenei afiafi.

E faapea foi ona ou faatalofa atu i le Failautusi o le Maota Fono, faapea foi le afaigaluega ua faapea ona galulue punouai i lenei afiafi.

E le mafai foi ona faagaloina le faatalofa i Le Ao Mamalu o lo tatou Malo faapea le Masiofo, faapea foi le Sui o le Fono o Sui Tofia ma le faletua.

E faatalofa atu foi i le faamasinoga i le Faamasino sili faapea foi Alii ma Tamaitai faamasino. E faatalofa atu foi i le Peresetene o le Faamasinoga o Fanua ma Suafa, aemaise o Alii ma Tamaitai Faamasino.

E le mafai foi ona ou faagaloina le faatalofa i si ou itumalo o Faleata 1, o faapea ona faafofoga tapuai mai i lenei afiafi. E faatalofa atu i le aufaigaluega tofofi o lo o faapea ona faanonomanu ma faafalelemalu i totonu o nuu ma afioaga o si ou itumalo, o lo o faapea ona tatalo ia maua se manuia o alo ma fanau, aemaise foi o si o matou itumalo. E faapea foi tupu ma tamalii o lo o faapea ona papaaao i totonu o le itumalo, malo faafetai. E faafetai i lo outou lagolago aemaise o le tou lagolago ua mafua ai ona ou tulai atu i lenei afiafi.

A o lenei afiafi, e fia avatu foi se manatu o lenei itumalo, aua foi le Tala Faatatau Faaopoopo o le tupe o lenei tausaga. O lea e fia momoli foi le agaga faafetai i le Minisita o Tupe, e manatu e leai se faamatalaga tele i le tulaga i le tala o le tupe, ua faamalieina ma atoatoa lou nei sui usufono, i le Tala Faatatau Faaopoopo o le tupe, i lenei foi vaitau. O lea e momoli le agaga faafetai.

E pau lava lea, o nai manaoga e ala i lou tulai atu, e toe fia faamanatu, e leai ni manaoga fou, e pau lava lea o mea e fia faamanatu. O manaoga foi ia e pei sa ou lauga ai foi i le la tausaga i mea e fia faaleleia o lou itumalo.

E muamua foi ona ou faamanatu atu i lau Afioga i le Minisita o Felauaiga ma Galuega Tetele a le malo, lau Afioga Olo. O lea ou te matauina ua uma ona asia e lau Afioga, ma le Matagaluega ia le auala i luga i Moamoa. Ou te le toe fai atu, o lea ua e salafia, ua taatia atu o le a se taimi, o le a foi se aso o le a finagalo i ai lau Afioga o le a faatino lea galuega. O le a faapea lava ona taatia atu i lau Matagaluega aemaise o lau afioga.

E faapea ona ou faamanatu atu, aua ua uma ona tatou asia le...e i ai le auala laupapa la e i uta i Moamoa fou, le auala foi lea na motu i le 2020. O le auala lena, e faafetai lava e le o tetele ni timuga ma ni lolovai i lenei vaitau, i le amataga o lenei tausaga. O le auala lena e le o sefe mo i latou o lo o alala ma papaaao i le itu atu o le auala laupapa lea. E masalo ana faapea e tetele ni timuga, o le a faapea foi ona toe tafea uma le mea lea sa tanu aua le sopoia mai o taavale. O lea e tatalo atu ai i lau afioga, masalo e le toe tau faamatala, o lea ua silafia ua uma ona oulua asia ma le Ofisa Sili o Pulega o le Matagaluega aemaise o la outou ofisa. O le faafetai sili lava o le galuega lea o lo o faatino i le vai lea i Sinamoga, talaane o le auala laupapa i le magatolu i le alu i Moamoa, e momoli le agaga faafetai i lau Afioga, o lena ua faatino le galuega lena. O la e le i maea, ae ua matauina e nisi foi o le afioaga ma isi foi o le itumalo, o la ua i ai se galuega ua faatino ai, o lea e momoli le agaga faafetai i lau afioga.

E faapea foi ona ou toe faamanatu atu le isi vaega lea i Lotopa, o lea ua maea ona asia e lau afioga ma le Matagaluega, i le vaega lea e i totonu o Lotopa, lea e faafesagai tonu ma le faleaoga o Pesega, lea e i ai le aai o

Mamona, e tasi lena vaega e pito sili ona mafatia i le taimi o lologa ma timuga. E i ai nai aiga sa nonofo i ina ua matua o ese motu lava ma o latou eleele ma o latou fanua, na faatau i ina, ona ua le mafai ona nonofo ai i ina, ua malosi le lolovaia o i ina. O lea e faamanatu atu i lau Afioga e le toe tau fai atu, o lena ua silafia ua uma ona asia. O lea e momoli ai le agaga faafetai i lau afioga.

E faapea foi le isi vaega, e masalo o i tonu lava lea e mafua ai ona lolovaia le taulaga i Apia, i tua i le alu lea agai i tai i le mea lea e i ai le SMI, o i ina e leai lava ma se galuega o faatinoina ai, e pei o i ina lea e taape ai le vai pe a tafe mai uta. Aua e le i sua i ina, e na ona faailoa atu i lau afioga ma le Matagaluega, sa ou faalogo o le a oo atu ai la outou galuega, aua le faaleleia o lena vaega o le itumalo, o lea e momoli ai le agaga faafetai.

Ona ou see mai lea i lau Afioga i le Minisita o Faamasinoga. O lea sa ou auai i le lotu faamanatu o le amataga o galuega a le Ofisa o Faamasinoga i lenei taeao, sa vaaia lava ma le fiafia le afio mai o Alii ma Tamaitai Faamasino aua foi se faamanatu aua le latou galuega e feagai ai. O lea e momoli le agaga faafetai i lau afioga i le Tamaitai Minisita, aua o la foi ua sologa lelei ia galuega a le faamasinoga, e pei ona sa toa ai ona o nisi o tulaga e pei ona silafia.

Ona ou see mai lea i lau afioga, o lea e matau atu e le o afio mai le afioga i le Minisita o Leoleo, ae ou te iloa o lea e afio mai lau afioga i le Sui Minisita. O le po Aso Tofi po o le po o le Aso Lulu lea na ou faalogo ai i le faasalalauaga a le afioaga o Apia, i le tulaga o laau malomaloa se i tulou i le taimi o faigalotu. O lea na ou faalogo o le a toe faamamalu sa ma tapu a le afioaga o Apia. E momoli le agaga faafetai i le afioaga ona ua toe lalaga mai i luga le vaega lea. O le vaega foi lea sa ou lauga muamua ai i le la tausaga. E i ai foi si sui o le itu lea sa faapea ona lavea i lana lauga, ia le tulaga lea i laau pisapisao i le taimi o faigalotu. Ua ou taua le vaega lea, ona e tasi lenei nuu ma lenei itumalo e aafia tele i tulaga lea. Ae pei e le o i ai lava ma se galuega o faatino i ai a le Matagaluega i laau ia o lo o faapea ona pisapisao i tami o faigalotu.

O le taimi foi lea o le tapuaiga a lo tatou atunuu i le Toa Samoa, ua ou vaaia ai le tele o taavale ua le i totonu o le taavale ia le laau, ae ua tuu i luga o fale o taavale. Ua atili ai ona leo tetele i luga ia laau ia. E na ona ou faamanatu atu i lau afioga i le sui Minisita o Leoleo ina se i silasila ifo i lea vaega. Ina ua tele le afaina o nisi o afioaga tu taulaga ona o le tulaga lea.

**Afioga Fepuleai Faasavalu Faimata Sua:** Pe maua se avanoa lau Afioga i le Fofoga Fetalai.

**FOFOGA FETALAI:** Ia malie le sui usufono, se i tuu atu le avanoa i le Sui Minisita, oi le Minisita Lagolago o le Matagaluega.



**Afioga Fepuleai Faasavalu Faimata Sua:** Faafetai mo le avanoa, faafetai faaea i lau afioga i le Sui Minisita o le Matagaluega a le Palemia. E talu ai ona ua malaga le tama o le Matagaluega, ae o lo o afio mai le Sui Palemia o lo o tauaveina o le Matagaluega i le taimi lenei. Mo le faamalamalamaina o le vaega lea, ana o au ua leva ona ou tali atu faafetai.

**FOFOGA FETALAI:** Oi, o lea la ua manino. O lea ua faafofoga mai o le Sui Palemia o lo o avea ma sui Minisita o le Matagaluega o Leoleo. Ia faauma mai le saunoaga.

**Tofa MANULELEUA PALETASALA T. TOVALE:** E faamalulu atu o lea lava ou te alu atu lava sau faamatalaga ona o lau Afioga o le Sui Minisita o Leoleo, ae ui i lea, o lea e faafofoga mai le afioga i le Sui Palemia, o lo o i ai tonu le vaega lea, faafetai mo le faamanatu mai. O le isi vaega, o le vaega lava lea o le Matagaluega o Leoleo, e i ai le magatolu lea e i tonu lava i le matou nuu i le alu lea i le aoga a Taupo Sa, le aoga lea a Saint Mary's. E manaomia lava se leoleo e tutu ai i ina i taeao ma aoauli i le taimi e tuua ai aoga. O le tele ia o le faaletonu lena e i ina i le taimi o taeao, e toetiiti lava toe oo i o i faleaoga le queue a taavale, ua fai sina poloka o le sau mai o i Vaitele tau mai i, ae ua le mafai e taavale ia ona omai i totonu. O le isi taimi ua fosi mai lava le oso mai o le taavale i totonu, o i ina e mafua ai le faalavelave e tupu. O lea foi sa avatu ai le talosaga a se isi o vaega a le matou komiti foi ia e faufautua i le tulaga lea, se i silasila ane lau Afioga i le Minisita i le vaega lea. I vaai ane lava se leoleo se toatasi, e tutu ai i ina i taeao ina ia faigofie ona omai taaavale ia e fia omai i luga o le auala, ona iloa lea ua saogalemu lena vaega, aemaise le toatele o aoga lea e i ai i le vaega lea o i i le matou nuu. E toatele foi tamaitai aoga o lo o kolosi ma savavali i autafa o le auala, o lea e fia maua ai se fesoasoani i lau afioga i le Sui Palemia, pe mafai ona faatino ifo lea vaega.

Ou te lagona e pau ia o se vaega ou te fia talanoa i ai i lenei afiafi. Aua e pei ona fai atu, o mea uma ia ua uma ona asia ma saunoa i ai le afioga i le Minisita, o lea na ona ou tulai atu e toe fia faamanatu atu. Ma le agaga faaaloalo i lau afioga i le Fofoga Fetalai. Faafetai mo le avanoa.

**FOFOGA FETALAI:** Faafetai mo le saunoaga ma toe faailoa mai foi nisi mea na laga e lou itumalo, ia malo lava faamanatu.

Se i tulai mai le sui usufono mo Salega.

**Afioga FEPULEAI FAASAVALU FAIMATA SUA:** E momoli le agaga faafetai i lau Afioga i le Fofoga Fetalai mo le avanoa.

E faatalofa atu foi i lau afioga i le taitaiina o le tatou fonu, aemaise foi o le mamalu o le Matagaluega o le Fono a le Palemene. E faatalofa atu foi i

le tapuaiga a si ou itumalo, e faamanuia atu foi le tausaga fou, tatou feiloai foi ina ua maea le Kirisimasi, tatou lulu lima ma tatou faatalofa, ua mavava atu na atuvava o lenei tausaga. O lea ua tatou savalia lenei tausaga fou, faafetai tatalo, faafetai foi mo fautuaga e tusa ma le tatou feiloaiga i le malae o le Ma i lenei vaitaimi, ma lenei aso. O le a foi se mea e umia e lo outou sui usufono e umia atu, e fai lea ma sau molia aua lo outou nofo tapuai.

Ia agalelei mai le Atua ma faamanuia i le tapuaiga aua le afio o tupu o le itumalo, Tapaau ma Faleupolu o Tofiga aemaise foi o le tapuaiga a le fetalaiga ia Tui Salega e aliitai i lona itu ma pule i lona itu, le mamalu i le nofo a faleupolu, Sa Asoa ma le Falefa o Sama'u aemaise foi o le faleupolu a Sa Leutogi ma le fetalaiga ia Faimanu. O le mamalu lea o si ou itumalo e faatalofa atu ai i lenei afiafi.

E faatalofa atu foi i le mamalu o le Kapeneta, siiga gasegase a le Taitai o le Malo, le afioga i le Tamaitai Palemia, lau Afioga i le Sui Palemia ma le mamalu o le Kapeneta. E faatalofa atu foi i le la Itu, le Sui Taitai o le Itu Agai ma le mamalu o sui usufono po o sui filifilia mai itumalo taitasi. Ae tainane foi o le nofo a sui Minisita po o Minisita lagolago o Matagaluega taitasi a le Malo.

E le faagaloina foi le tapuaiga a le aufaigaluega tofofi a le Atua i so o se Fatafaitaulaga, ekalesia o lo o nofo tapuai aua se manuia o Samoa ma ona tagata. a o le tapuaiga tatalo a le Afioga i Le Ao o le Malo ma le masiofo, le afioga i le Sui o le Fono o le Sui Tofia ma lona faletua.

Le afioga i le Faamasino Sili ma le Pulega o le Matagaluega o Faamasinoga, Talofa lava i le agalelei o le Atua i lenei afiafi.

Ae ua ou tulai e faaali se lagona o lenei itumalo, so matou sao aua le Tala Faaopoopo Faatatau o le tupe, i lenei afiafi. E muamua lava ona momoli lo matou agaga faafetai o lenei itumalo, ona o le matou vaavaai atu i le Tala Faatatau o le Tupe Faaopoopo pe na o le 8 Matagaluega ia ua lautogia, faafetai i lau afioga i le Minisita mo le limalima lelei, ma le faasoasoa tatauina o tupe a lo tatou atunuu. E talu ai e le o aafia mai le Matagaluega o le Soifua Maloloina, e faaleo le agaga faafetai i lau afioga i le Minisita. O le tele lava o taimi ou te tutu atu ai ma faatagita atu ia manaoga o si ou itumalo. E mataulia o le falemai lea i Foalalo e tolu itumalo e agai i ai. O le tele foi o itumalo ia e tagisa i falemai. Ae manatu o le itumalo lenei ma Salega 1 ma Salega 2 ma Palauli, o le itumalo o le Minisita o Tupe, e tasi lava si o matou tamai falemai la e i ai. Ae o lo o lelei lava le faasoasoa ma tagitagi atu lava i le Minisita ma talitali atu. E toe pau lava lea o si mea o la e tau faaletonu, a o lea e momoli ai le faafetai, o le afi moli. E faatolu ona ou alu i le falemai i lea afiafi, pe le power, o nai faafitauli e le maalofia e le Matagaluega, ae o lo o i ai nai gasegase, ae faafetai o lea ua maua na e asia, ua ou fiafia ina ua ou vaai o tu lou sa i le lotoa i le falemai. Ai masalo o le a ola taeao, faafetai mo lea galuega fesoasoani mo le falemai a si o

matou itumalo. O le isi Matagaluega lea e le o sau ai i se tala faatatau o le tupe o le Matagaluega o Galuega. E faafetai i lau Afioga i le Minisita, i le vaitaimi o le vevesi o e feoaiga o tagata i Salafai. Ou te iloa o Salafai lea e tumu ai Tumua nei. O le toatele foi o Salafai lea e fai le sao i le Matagaluega lea o Vaa. Ua ou vaai lea o se mea muamua ua fa vaa e feoi i le aso e tasi. E le iloa pe tai tutusa ma le malaevaalele e fa vaalele e palasi i le itula e tasi. Ae ua leai foi nisi e toe nonofo i luga o le uafu, ona o le lelei o le faasoasoina o vaa e le Pulega, faafetai i le Ofisa Sili mo le mataituina o ia vaega taitasi, ma le mamalu o le Pulega. E faafetai mo le tulaga lea.

O le isi itu e momoli atu ai le faafetai i le Minisita, o lou auala lea sa ou tagitagi atu ai lava i le amataga o lea Paeaiga. Ua onosefulu nei tausaga e lei savali lava Faiaai i se auala ta, o lona auala galue. O la e tau toutou lava i le auala maa ma le auala mutia, e taumalua lava i uta ma taumalua mai, a o la e talosaga mai. A o lea ua maua, o lea ua maea foi ia tauofoga, fai le fono a le matou nuu ae talosaga mai, ona ou faailoa lea i ai, o le taimi nei o lea ua saunoa atu le Minisita ua oo atu le faasologa. E masalo ua ala ona tuai ona o atu konekarate ona o lea faatoa ae galuega. ae faatalitali mai le iloa po o le vaiaso fou, o lea ua faafofoga mai le Minisita, ia vili loa i konekarate e amata loa le tatou galuega, o la ua faatali mai le nuu, faafetai i lau afioga.

O le talosaga tuai lava lea na ou talosaga atu ai, o si o matou nuu o Siuvao. Ua tasi leni aso matou te tatalo ai lava i le Atua matou te tatalo ai lava ia timu. Tulou le afioga i le Taitaifono po o le Minisita o Faatoaga, aua o lona itumalo sa tali i lagi le vai. Ae o lea la ua fai e lou itumalo le nuu lea o Siuvao. E oo mai i le taimi leni e le i i ai lava se paipa. Matou te fiafia pe a timu e maua ai sina vai aua le afioaga. A o lea la, e toe tatalo atu ai, pe le i oo mai se taimi i se paipa o si o matou nuu o Siuvao ma se vaega o Fagafau o lo o i uta, e le i oo lava i ai le vai. O mea tuai lava e na ona toe faamanatu atu lava leaga o lea e le o i se tala o le tupe i lau Matagaluega.

Ona oo mai lea i le Matagaluega o Siosiomaga lau Afioga Toeolesulusulu, ua malo galue, malo taupata i feau ma galuega faale-malo. Ou te tatalo atu i le vaitafea lea e i i, i Fogatuli, sa le masani ai, a o timuga foi nei, ua amata foi ona sau le vai ma ova i luga o le auala. O le mea la e tupu ua faateteleina i luga le iliili i le alavai. Ae i ai lou talitonuga o le suiga o le tau, sina fesoasoani i le vaitafe lea o lo o kolosi i le auala, pe mafai ona sua ese.

Ma le isi vaega o le matou pitonuu lea, silafia foi e tasi lea itumalo e mato. E i ai le auala lea e agai ai si o matou afioaga lea e fagogota, e le mafai ona o uma i lalo tagata e piipii i le amu, pe le maua se fesoasoani, mo le tulaga lea i fesuiaiga o le tau, ina ia faalaulelei ai le auala fagota lea o si o matou nuu o Fogatuli. E mataulia foi sa i ai le faalavelave sa tupu i si o matou itumalo. E faauala i lau Afioga i le Minisita o Galuega, pe le mafai ona fain i nai taligalu pe ni uamea, e amata atu lava i le isi itu e tau i o i, Siuvao,

ona o lea sap au ai, tulou lava, le tama foi o lenei itumalo, pau ai lona sa i lalo, ma silia i le fa aso o saili. Ae peitai faatoa maua ane, e le i matauina pe na silafia e nisi ua pau le tama ma lona sa lea. Ua leai se mea e mafai, ae aoga foi mea tutupu, e tuualalo atu ai, pe le tatau ona fai ni mea e talitali ai taavale mo le saogalemu. Aua e lelei lava ia matou ia i Savaii e iloa, ae o le mamalu o le atunuu e agai atu i Tumua, latou te le silafia uma lea vaega, ia laveaina mai ai latou, ne i te i ua toe pau se isi, ona tuuaina lea o le faipule o le itumalo, ua leva ona nofo, ae le lagalaga mai lea vaega.

Lau Afioga i le Minisita o Faamasinoga, malo taupati, vaai lava i le matagofie o le faigalotu e amata ai feau, o lenei tausaga. E faafetai foi o lea ua toe tulai mai lau Ofisa Sili, o lou lima taumatau lea i le Matagaluega aua le Pulega ma le Matatgaluega o Faamasinoga, ma le pasiaina o tatou Tulafono o lea o le a amata ai faamasinoga o Fanua ma Suafa.

Ona lasi mai loa lea o le talanoa po o se lagona o lenei itumalo i lau Afioga i le Minisita o Tupe, e tusa ai ma le faasoasoaina o tatou seleni, ia faafetai. O lea ou te vaai atu i le Matagaluega lea o Pisinisi ma Alamanuia ma Leipa, po o lea e tauave e le Minisita lea o Toeolesulsulu. E i ai le tupe lea mo totogi o le tagata lea e sooupu, e manaia pe ana faapea e lua ni sooupu i Ausetalia ma Niu Sila, i faafitauli o lo o tutupu mai alo ma fanau. O nisi foi o alo ma fanau ua sosola ese mai ma galuega, ona e ese lava mea na ta saina e tamaiti iinei, ese lava mea e o atu i o faafesagai ma alo ma fanau. O le ala lea o le sosola ese o tamaiti, ua le lelei foi le tausiga e konekarate po o matagaluega i o e vaai. A o nai alo foi ma fanau e le lelei tele foi se malamalamaaga i le gagana. Ae o le taua lea o le sooupu lea ou te vaai atu e tele le seleni lea e totogi ai, pe le tatau ona faalua ni sooupu, e alu le isi i luga i le isi itu o le motu, ae alu le isi i lalo i le isi itu o le motu.

O se manatu lea o lenei itumalo, o le aotelega e lagolagoina e lenei itumalo le Tala Faatatau Faaopoopo o le tupe. Ia manuia tele lau Afioga i le Fofoga Fetalai, manuia foi le Kapeneta ma le usugafono mamalu, ma le la Itu o le Maota. Aemaise foi o le tapuaiga a Ofisa Sili o Pulega o Matagaluega taitasi, ma le tapuaiga a si ou itumalo. Manuia le afiafi, soifua.

**FOFOGA FETALAI:** Malo faafetai, tulai mai le sui usufono mo Falealupo.

**Afioga FUIONO TENINA CRICHTON (Falealupo):** Faafetai i lau afioga i le Fofoga Fetalai, mo se avanoa matagofie ua maua e lenei itumalo i lenei vaega o le afiafi, aua le tauaofia o le Fonotaga mamalu. Aua le afioga i le Tamaitai Palemia e faalupe i vao, ona o tulaga o faigamalaga. Aemaise foi o lau afioga i le Sui Palemia, alii Minisita o le Kapeneta, faapea foi Minisita Lagolago. O lea foi Itu i le afio o lau Afioga i le Sui Taitai, aemaise foi o le paia i sui usufono o le Palemene aua Samoa ma lona atinae a taeao. O sa ma faigata o le aso, e le toe tau laeiina, leaga o le

maa lava e osofia i soo se taimi, aua lea aso ma lea aso, aua le tapuaiga o Le Ao Mamalu o le Malo, aemaise foi o le Sui o le Fono o Sui Tofia. E faapea foi le paia o le Ofisa mamalu o faamasinoga o Fanua ma Suafa. Ua tatou i ai i lenei masina muamua o le tausaga, aua tatou galuega faaauauina. E faafetai ai i le alofa o le Atua, e ui lava ina tatou femilosai ma le faamai, ae faafetai e leai se tasi o afaina, o lo o usufono uma sui usufono o e Palemene aua lana fonotaga muamua, o le agaga faafetai lea aua lenei aso ma lona faamoemoe. Aemaise foi tapuaiga mai a si ou itumalo i Falealupo aua foi se taumafaiga ose sao aua le taumafaiga o atinae mo le tamaoiga. O se matou faamatalaga, o le a ui atu ia i tulaga o mea ua uma ona talanoa atu ai. Aua afioga i Minisita, ma a latou Matagaluega. O lenei nuu lava foi nuu o Falealupo, o lea ua taoto i le laulau a Minisita, ia talosaga i le tausaga ua mavae, aua o mea lava ia o lo o matauina, faagaoioia o mea uma i le tamaoiga o aualatetele lava mea ia e faaogaina, o auala galue faatino ai lea galuega taua. O lenei vaitau i timuga ua matua tetele lava, ua faaopoopoina foi le aia tele o auala. Aua e le i oo atu lava se vaa faaola mo le laveaiina. O le tilotilo la ma le vaai ai, a tuai atu ia le vaa faaola, ia e o atu ua leai ni auala. Ua o i lalo o laau ona ua malosi tele tafega i lenei vaitau leaga ua siisii le suasami ma le suavai, ia leaga o galuega e fai e le tagata ae afaina ai galuega mamana a le Atua.

Ia i le tilotilo lava na ma le vaavaai i ai, i ia vaega taua e toe tuu atu lava ma toe faamanatu atu, i lau afioga i le Minisita o Galuega Tetele a lo tatou atunuu aemaise o le auala galue sa faatino i le tausaga ua mavae, ua maumau le galuega ua toe afaina foi. Ia aemaise foi o lona itu atoa i gauta ua e silasila foi i ai, ia o lo o i ai se Lotu tele o tu ai i gauta i le mea lea, ia ua faigata ia feoaiga.

E oo foi i suavai lau afioga i le Minisita, ia e le o oo i ai se suavai i lea vaega tele o lou itumalo. O le agai i uta, e le mafai ona ae le vai, a o le alu agai i tai i le aai, e faigofie le see a le suavai. E tatalo ai i lau afioga, e le maua lava se pamu e taumafai ai e tulei ai le suavai e agai i gauta? Ia ona fiafia lona mamalu o tagata o i ai, ma nonofo ai lava e oo mai i le aso.

O tulaga ia o lo o tilotilo i ai i si o matou itumalo. Ia e oo lava foi i tulaga o le auala ma ona poumoli, ia o lea foi na talosagaina, ina ia fai ni moli o pou, ia aua le fegasoloaiga o le mamalu o lenei itumalo.

E faatusa le alu i Falealupo i le 5 maila agai i tai i le aai. E le mafai ona savali atu se tasi i le pogisa, i uta i le aai. A fai ae savali atu se tasi i le po, ia o le nuu ia e i ai ona sa e i ai ona tapu. E le mafai ona savali ai se Falealupo ona ua tele mea tutupu. E le o ni tagata e faaleaga tagata, ae o mea lava e tutupu, mea foi na e taua ai i le aganuu Faa-Samoa o tapuafanua. Ia e afaina ai soifua o isi. Ia leaga e le sese lava o tala lava o le vavau e le mafai lava ona sese e oo mai lava i le aso. E pei o le faamanatu atu lona i lau afioga i le Minisita lea vaega taua o auala.

O le isi vaega o lo o tilotilo pea i ai, ona o le auala lava lea lau afioga o lo o pio i ai le maga o le auala savali agai i Fagalele, o se Faga taua tele lea Faga, e logologoa foi ona tala i le atunuu. Ae na pau lava lea o le mea o lo o tilotilo i ai, a mafai ai se auala, o ni faletalimalo mananaia i le afea, lea vaega eleele o Falealupo o lo o i ai nei i tai i le aai. E leaga o lo o i ai lava le muagagana, 'ia a fai lava ua soua le ogasami i Puava, e pau lava lea o le mea e te lafi i ai, o le ogasami i Fagalele' po o le Faga i Fagalele, e maua i ai lou toafilemu.

Ia o vaega taua ia o tatalo o lo o tuu atu, i lau afioga i le Minisita e te silasila ane i ai, ia aua le faagasolosologa o galuega i lau afioga. Leai e leai foi se faananati, leaga o lo o tele foi galuega, ia o lo o autovaa atu i le taumafai atu i lea itumalo ma lea itumalo, ae pei e avatu lava o se faamanatu, ina ia i ai se taimi, ia ae o lea ua fagufagu atu i lau afioga.

O le isi vaega taua i lenei aso, ia o le tatou miliona. Ia ua se tai faalogo foi lea vaega i le fai pea, fai pea, fai pea, talu ai ona o itumalo faalogotata lea e i ai nei, ua afaina ai ma itumalo o lo o lelei fuafuaga, aua tulaga o poloketi ua maea ona faagaioi. Ua leva ona tutu fale ua maea, uma foi ona sue tusi ua maea. Avatu le isi \$130,000 ua maea, ao lenei lava e faatali le vaega o le miliona ia aua tulaga ua uma ona faatino, ia ma aumai pepa o fuafuaga a lea itumalo ma lea itumalo, aua lona atinae.

A o le mea lea ou te talitonu i ai, ua afaina uma lava nei mea uma, ia ona ua afaina ia le tulaga o le tupe, ia ona o le faatamala o itumalo taitasi. O le ala foi lea, e tagi atu lea, tagi atu lea, tagi atu lea vaega ina ia taumafai. Ia ae o matou nei ua leva ona maea, ia o lenei lava e talitali lava, talitali lava. E leai e leai foi se faamalosi, e taumafai atu ai, pe a fai o lo o i ai mafuaaga tatau, e taofiofi ai ina se i maua se... ma suiga lelei o mea uma. Ia aua a o faatasi, o se mea taua lena. Ae a o tasi tasi foi lea, o ia e uma le isi vaega, ia e uma lava le Tausaga Faaletupe e leai lava se mea. Ia i le tilotilo lena ma le vaai, i le tulaga o lo o tatou agai atu i ai, ia mo lenei foi tausaga ua o tatou aulia. Ia o outou lava o alii Minisita, ia o lo o faafoea lea vaega, ia o le taua lena, e taugologolo atu pea.

O le tulaga i le penisione o tagata matutua, se faafetai tele. Faafetai tele, e ui lava ina itiiti se vaegatupe e \$50, ae lagona le faafetai ona o le tepaaiga, o e foi ua tulaga matutua faasolo ina pulapula lagoto le la, toomatufofoga, ua leva ona tautua i le atunuu. Ia ao sia vaega taua, ia o lea ua outou faapale, ia o le matagofie lena ma lelei.

Ia o nisi o vaega e ui lava ina leai se tupe faaagaga mo le soifua maloloina, ia ae lau afioga i le Minisita o le Soifua Maloloina, e momoli foi le faafetai i lau afioga. E faaleai ni mai tigaina i lenei vaitaimi, ai ona o le lelei o fomai. Na pau lava lea o se tuualalo lea e avatu i lau afioga, ua tele foi ina lapopoa le toatele o fomai, ua tau le mafai ona gaoioi. Ae lelei le aualii paeae foi ia o lo o i ai, e vave ona pai atu i le gasegase, ia ma maua ai se toafilemu.

O le galuega e pei o le tatou foi falemai, leai e pei ona faafetai atu foi, o lo o sologa lelei lava mea uma. E leai se mea o faaletonu. Ae ia e toe tepa tasi lava ia Falealupo, leaga sa i ai le falemai muamua. O le falemai lava lea sa sulufai i ai Falealupo, o le mai lava ua tigaina tele, faatoa mafai ona aumai i uta i Sataua, ae togafiti ai lava i tai, i lona falemai sa i ai. E le toatele ni fomai pe toa 2 ni fomai sa i ai, teine tamaitai, ia e pei o i ina le sulufaga muamua lena o le matou nuu. Po o le a lava sina fale e faatino, e fai ai lea vaega o le tiute, ia ae o le tatalo lava a le sui usufono o Falealupo, ina ia maua se fesoasoani vave.

Ia aua e pei lava ona fai atu, leaga e 5 maila le sau i tai i le aai, seia paia uta, ona oo atu lea i le mea o i ai le falemai moi, ia ae ua keke le mai ua malolo ua uma. Ia e pei o le soso atu lena i lau afioga i le Minisita aua galuega o lo o faatino, ia aua le faatinoga o mea lelei, aua o le mea pito taua lava lea i le soifuaga o le tagata, o le soifua maloloia.

Ia faafetai foi i le Tamaitai Minisita o Faamasinoga, ia o matou nei sa i ai i lea taeao, ese foi le lagona, le taua ma le matau, o mea mamalu ma mea paia, mea ua faatino i lea taeao fou. E maligiligi loimata, leaga o le galuega ua asoa o taatia. Ia o le mea lea e avatu ai le faafetai i lau afioga, ia leaga o le tala lava o le faiva i vai, ua e tau ai o lapega, e pei o faiva i tapalega. O lea ua tu manumalo le faamoemoe, ia o le taua ia.

Ia o le taeao foi lea na tupu ai le faalavelave i le mea sa o matou i ai. Ia ona o tulaga faapena, ia o mea lava o fesoaaia ua i ai lenei vaitau, ave i Sasae, Sisifo, Saute ma Matu, tulaga o upu i luga o upega tafailagi, ma mea o lo o tutupu i le lalolagi, ia o le ala lea ua afaina ai lea taeao i se tasi foi o tama, lea sa avea foi ma Taitai foi o le la Itu.

O le mea lea e tuutuualalo pea i le paia o le tatou Maota, tatou faagata ia o ia mea, aua o le mea lava lea o le a tutupu mai, ia [.....].

Ia i le lagona la lena, e soso atu ai ma le agaga o le faaloalo, ina ia faagata ia o nei mea aua e tatou te toe o i ai. O lea ua manaia le fealofani matagofie, faafetai i le Sui Taitai, ia e ui lava ina faalogogata i le isi taimi, ia ae leai o la e i ai lava ia le vafealoaloai i le silasila i le Nofoa, ia aua le galuega o lo o taumafai mo le lelei o le tatou Maota.

**Afioga Sulamanaia Fetaiai Tauiiili Tuivasa:** Lau afioga i le Fofoga Fetalai...

**FOFOGA FETALAI:** Ia...

**Afioga FUIONO TENINA CRICHTON:** O mea uma lava la o le faamoemoe...

**FOFOGA FETALAI:** Faamalie atu i le sui usufono o Falealupo ia se i tuu atu le avanoa i le...

**Afioga Sulamanaia Fetaiai Tauiliili Tuivasa:** Ia faalogologo lava ma le totoa i le saunoaga a le tama matua. Ia e leai foi se agaga e faalavelave foi ona e matua foi le soifua o si toeaina. Ia ae o saunoaga foi na e paia ai nisi e le o i ai i totonu o le Maota Fono nei lea e tau avatu ai se tuualalo i le saunoaga a le sui usufono mamalu. O lea e taua ai faapea ua oo ai ua fasi ai e loomatutua le Taitai foi o lenei Itu, leaga e tumu i le ava lenei Vaega Faaupufai i e o lo o ave i ai le faamuamua.

E pei la o le tatalo i lau afioga i le Fofoga Fetalai i le sui usufono o lo o saunoa nei, aveese ia saunoaga e le logomalie i lou sui usufono leaga o le Taitai lea o lenei Vaega aemaise foi o le toe ulutaia foi o lenei Palemene, ia ae o ni lafoga foi e pei e faaataatalafoga, ae le logomalie i le faafofogaaga a le Maota lenei.

O oe o le tagata matua, o lea foi e te saunoa i itumalo e... ou te le i faalavelave lava. Ae o saunoaga e le logomalie i le Maota lenei lau afioga, e le tuufau foi. Pei o lea foi e faalogo i itumalo faalogotata, ia leai e le o se faalogotata. Ia o lea foi e faapea ita ai o i matou nei ua le avatua i totonu, ae o lea foi ua maua leai. O le a le mea o le a... o lea ua leva ona faamalieina outou. Ae o le a le mea o le a avatu [.....]. O le a le mea o le a avatu i ni miliona pe a ua leai se tupe?

E pei o le agaga lena e faatu atu ai se lafo, *E aveese ia saunoaga ia ua fasi e loomatutua leaga o le Taitai o lenei Itu lau afioga i le Fofoga Fetalai.*

*Na faaluaina le lafo e le sui usufono o Aleipata Itupa i Luga.*

**FOFOGA FETALAI:** O lea ua faaluaina, ia o lea o le a aveese ia saunoaga ia. E manatu foi le sui usufono o Falealupo, ia e fautua atu foi i tulaga mamalu o tatou saunoaga, ia aemaise foi o le paia foi o nisi o sui usufono o le Maota ae tatou te le o mafuta.

O le mea lea ia o lea ua maea lea vaega.

Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Falealupo... “[o le tafasi e loomatutua pe a feoai]”.

**Afioga Hon Mulipola Anarosa Ale Moliioo:** Lau afioga i le Fofoga Fetalai....



**FOFOGA FETALAI:** Se i tulai mai lau afioga i le Minisita o Tupe...

**Afioga Hon Mulipola Anarosa Ale Molioo:** Ia atonu foi ua laga foi se manatu ona o le lafoga foi a le afioga foi i le sui usufono. Ou te fia tali atu foi i le afioga i le sui usufono o lo o saunoa i le sui usufono o Falealupo.

Mo le silafia, o lea ua maea ona iloilo e le tatou Komiti ia lau \$425,000. O le vaiaso lenei, ia o lea foi ua faataatia uma ia tatou itumalo, ua maea ona faatino i ai le iloiloga, ma ua ready foi e tuuina atu i tou teugatupe, ona ua faamalieina uma ia faiga faavae, ia e pei ona tatalo atu ai ia tatou Komiti filifilia.

Ae avatu lava se lagona faanoanoa foi i lafoga le faavaea a le sui usufono e pei ona lafo, ua leai ni tupe a le tatou Malo. Silasila, o le tatou Paketi muamua, \$11 miliona na faaagaga mo tatou tai \$200,000. O le taimi lenei, 51 itumalo ua maea ona faamatuu uma. O le tou le ususitai lava la, lea e ala ai ona tuai ona faamatuu atu isi vaega. O lea foi ua faagasolo isi tatou \$150,000 ma le tele o isi fuafuaga i totonu o le tatou Paketi ua maea ona faamatuu.

E tatalo atu lau afioga i le Fofoga Fetalai, aveese ia lafoga ia, leaga e leai ni faavae o lafoga ia e lafo mai, e taitaisese ai le tatou atunuu ma le faafofoga mai a Samoa, ma le faaaloalo.

**FOFOGA FETALAI:** E i ai se isi e faaluaina? Ua faatonuina foi le Failautusi e aveeseina upu nei ua leai ni tupe.

*Faaluaina e le sui usufono mo Salega 1.*

**FOFOGA FETALAI:** Ua faatonuina foi le Failautusi e aveeseina upu nei ua leai ni tupe. Ia ma o le fautuaga foi lea a le Nofoa, o lea e tou te silasila mai, o lo o lototele lava ia le tamaitai Minisita, ia e tatou te vaavaai pea i ai, ia ma aua ne i taitaisese ai le faafogafoga mai o le atunuu, faaauau le saunoaga a le sui usufono o Falealupo.

Upu na faatonuina e le Fofoga Fetalai e aveese mai faamaumauga o le saunoaga a le afioga i le sui usufono mo Vaimauga 1... “[*pe a fai ua leai se tupe?*]”

**Afioga FUIONO TENINA CRICHTON:** Faafetai, ia e leai e muamua foi ona avatu malu i puega i lena foi Itu ma la outou faafofoga, leai o tala lava faalauaga, ia ae afaina ai se finagalo. Ia leai o lea ua aveese ia faamaumauga, ia e le tatau ona toe uia, ia aua se faaumaga o le lauga a Falealupo i lenei aso.

Faafetai i lau afioga i le Minisita o Tupe, leai e talitonu pea le taofi, o mea ia o lea na talanoa atu ai, ona o le tele o le faiaga ma tulaga faapena, ia ua ala ai ona tuai ia fuafuaga. Ae o tulaga ia o seleni o lo o faataoto, o lea ua i ai. E le sese lava le saunoaga., e sao ma faamaoni. Ia o le lagona foi lena e ala ai ona fiafia le loto, ia aua o lea e fai mea uma, ana le faifaiaga ia le tatou galuega i totonu o le tatou Maota, ou te lagona ua faasopolia. Ia ae toe gaioti le isi foi \$ miliona. Ia ae o lea e faifaiaga lava, ia ma faapena ona toso lona umi ma lona faatinoga, ia aua lona faamoemoe.

O le lagona la lena o le vaega o le aso, e matua lagolagoina ai le Tala Faaopoopo o le Tupe aua lena aso ma luma o le Laulauafono, aua le Kapeneta, ia o alii Minisita Lagolago, lena foi Itu Faaupufai, lau afioga i le Sui Taitai, le paia o sui usufono, ia aua lena aso ma le tatou Fonotaga. Lagima ia o lau afioga i le Fofoga Fetalai, maua se manatu i lau afioga, aua le tafalu ma le laumea toli i le savili o le Maota, faalelea ia i le nuu le aina, ae ola le sui usufono mai i Falealupo. Manuia.

**FOFOGA FETALAI:** Malo faafetai mo le sao foi o le itumalo o Falealupo, ia mo le Tala Faaopoopo o le tatou Tupe. Ia ou te iloa lea ua matau atu ua leai se isi e fia saunoa, ia ae o le avanoa lena i lau afioga i le Taitaifono.

Ia faamalulu atu ia le sui usufono o Falealili, ia ua le maua atu le... ia o le mea e faaemo mai ia le moli, ia tau tu atu laitiiti i o, ua sau foi le pogisa o le afiafi... Ia ae tulai mai ia le sui usufono mamalu.

**Afioga MAIAVA FUIMAONO TITO ASAFO (Falealili 2):** Faafetai i lau afioga i le Fofoga Fetalai mo le avanoa. Ia e fai atu ai foi se sao o lena itumalo, ia aua foi ia le tatou Tala i le Tupe e pei ona taatia i le Laulauafono.

Ia e muamua ona ou faatalofa atu i lau afioga i le Fofoga Fetalai, malo le onosai, malo foi le faatoatoa. Faafetai foi mo le faatautaia o le Fonousu a Samoa i lena itula o le afiafi. E manatu ua vela foi le fala i lau afioga. Ia e ui foi ina o tatou le auai faatasi ma le afioga i le Tamaitai Palemia ona o siiga gasegase, ia tatou tau fai tatalo pea i le mana o le Atua, ia e toe faafoisia le malosai, i lana afioga i le Tamaitai Palemia ia aemaise foi o nisi Minisita o le Kapeneta.

Faatalofa atu foi i lau afioga i le Sui Palemia, faatalofa atu foi i alii ma tamaitai Minisita, afioga foi i Minisita Lagolago, ia faapea foi lea itu o le vai, i lau afioga i le Sui Taitai faapea foi le mamalu o sui usufono uma o le Maota. Faatalofa atu foi i lau afioga i le Loia Sili ma lou auvaa, tainane foi le paia ma le mamalu o Faauluuluga o Matagaluega taitasi o le tatou Malo. Ia aemaise foi ia galuega tumaoti.

Faatalofa atu foi i si ou itumalo Falealili 2, tulou outou paia ma outou mamalu o le a le oo i ai se faamatalaga. O paia lava mai i le vavau e oo

lava i le faavavau, vaeane le Afifio o Paia o Alalagafa ma le mamalu o Nofo a Tulafale, ma le Tauana Esee nai ia Falealili.

Ia e faatalofa atu foi i le Susuga i le Toeaina po o le afioga foi i le Taitaifono Aoa o le Ekalesia EFKS, faatalofa atu foi i le Susuga i le Failautusi le Laulauafono a le Ekalesia. Ia aemaise foi le paia o le aufaigaluega tofofi o le Atua i so o se fatafaitaulaga i totonu o si ou itumalo o Falealili 2. Faafetai tatalo, faafetai mo la outou tapuaiga. Ia tapuai maia se i fai se sao o le tatou itumalo ia e tusa ai foi ma le lipoti ua taatia nei i luma o le Laulauafono.

Lau afioga i le Fofoga Fetalai, e manatu e le umi se manatu o lenei itumalo, leaga e le tagisa foi ia lenei itumalo. E manatu foi ia e lagolagoina e lenei itumalo le Tala Faaopopo o le Tupe, ia e pei ona i ai nei. Ia e momoli atu ai le agaga faafetai tele i lau afioga i le Minisita o Tupe, ia e... mo le lufilufiina o tatou seleni. Faafetai foi i lau afioga i le Taitaifono ma le mamalu o le Komiti e tusa ai foi ma le lipoti maea ia e pei ona i ai nei.

Lau afioga i le Fofoga Fetalai, ia e pei e tau ala atu i ina le talosaga a lenei itumalo i lau afioga i le Minisita o Punaoa ma Siosiomaga. Ia e pei foi ona laugaina foi i le taimi ua sola, e talosaga lava ma le agaga mauualalo i lau afioga, se i e silasila ane lava ia o taligalu lava o si nei itumalo pei ona silafia, ia o o la e agi mai ai le savili. Ia a oo la ina omai faatasi ma le galu, ia ua matua tele lava le afaina o gataifale o lenei itumalo. Ia e pei e i ai ia Sapoe, Utulaelae, ia ma Salesatele. Ia manatu o le matou nuu ia o lea ua uma ona faatinoina i ia tausaga ua tuanai atu.

Ia ona oo mai lea i lau afioga i le Minisita o Galuega Tetele a le Malo, ia e pei foi ona ou alu atu ma ta talanoa foi i lea aso ua tea, le aso ananafi, ia sa faaoo atu ai foi se manaoga o lenei itumalo i lau afioga. Ia talu ai ona o lea e faalogologo atu o lea ua tele vaalele ne i te i ua galo i lau afioga ia se tuualalo foi a lenei sui usufono, e silasila ane lau afioga i le auala laupapa lea e i le va o Salani ma Utulaelae, faamolemole e pei ona tuu atu muamua. Ia ua maseese ma ua leaga faia foi ia laupapa o lo o i luga o lea auala.

Ia ae o se talosaga i lau afioga pe leai se isi suiga, ona o laupapa ia, e le umi lava ona sui ia ae toe leaga foi. Ae tagai ane lau afioga i le Minisita pe leai se isi suiga ina ia foia ai lea faiga ina ia umi ona faaoga i le lautele ona ua tele foi taavale foi taavale ua satia i luga o le auala lea. O le sasi lava ma lavevea ai i luga ona o le maseese o laupapa.

Ia faatasi ai ma moli auala i auala o si o matou itumalo. Ia o le nuu lea o Utulaelae i le alu i uta faamolemole, ua matauina le pepe o moli o lea itu o le itumalo. Ia ma se talosaga i lau afioga ona e i ai aiga o lo o nonofo i auala ia e pei e foliga o auala galue, ia ae ua tele aiga ua nofoia lea itu, ia e manaomia ia le toe faaleleia o latou auala faamolemole lau afioga pe mafai ona silasila ane i la lea vaega.

Ia faatasi ai ma faailoilo o le auala, ona o le tele o taavale, ia e o atu lava o sao i Salani tai. O taavale aemaise lava o turisi ma le tele foi o isi e

malaga atu i le itu lea, e tele na o atu faasasao i tai i le aai o Salani, ae manaomia se sign foi lea e iloa ai, o le auala e alu i Aleipata lea e ifo i le auala laupapa lea, ia ma le agai mai foi i Apia. O lea e talosaga atu ai mo se sign i la lea vaega, ina ia faafaigofie mo le femalagaiga o le mamalu o le atunuu, ia aemaise foi o tatou turisi malaga mai.

Ia faatasi ai ma se faamolemole ma se patupatu i luma o le fale o le galuega ia po o le Maota lea o le Faafeagaiga o le EFKS i Salani faamolemole, ona ua avea foi le lelei o le auala sa fausia i lea vaitaimi, ma soona o ai taavale. Ae na o se talosaga ona o le tele o alo foi ma fanau e o atu i le maota o le galuega, e tau faaitiitia ai le o o taavale i la lea vaega faamolemole.

Ia talu ai ona e le o aafia i le Tala o le Tupe ia le Matagaluega o Faatoaga ma Faigafaiva, ia avea ia foi lenei itula e momoli atu ai le faafetai tele i lau afioga i le Minisita o Faatoaga ma Faigafaiva, ia e tusa ai foi ma le avanoa faaauuro ia sa malaga atu ai ia lenei sui usufono i atunuu e mamao e tusa ai ma fonotaga sa auai atu ai. Ia e matagofie lava ia fonotaga sa auai atu ai, ae atonu e sau se taimi, ia ona silasila lea o le tatou Palemene i nisi foi o mea sa finauina e lau afioga, ia aua foi fonotaga sa auai atu ai.

Ia e momoli atu foi ia le faafetai tele i tou afioga foi i Minisita, i galuega foi sa outou fitaituga ai mai lena tausaga seia oo mai i lenei tausaga ua o tatou savalia. Ia e le faaitiitia lava le agaga o le faafetai tele, e tusa ai ma galuega lelei. Ia ou te manatu o le a tuu le isi vaega lea, ona o lea e vaai atu, e le o se Tala tele o le tupe lea e tatou te feagai ai, sei oo i le Tala Tele o le Tupe lea a le Palemene, ia ona toe laulau atu lea o mea tetele ia e nofo ma au.

Ae e pei o nai mea laiti ia mo lenei taimi, leaga e leaga foi pe a tele atu ae manaia le laulau atu o mea taitasi na e mafaufau atili ai. E pei o se tala atu na ma le agaga faaaloalo i lau afioga i le Fofoga Fetalai. Ia manuia tele lau afioga, ia faapea foi ia le Palemene nei, ia manuia si o tatou atunuu i le alofa o le Atua, faafetai.

**FOFOGA FETALAI:** Faafetai, malo saunao, ia o lea ua matau atu o lea ua fou mai le sa o Gagaemauga 2. Ia tulai maia lau Susuga i le Tiakono Toeaina.

**Tofa SEUAMULI FASI TOMA (Gagaemauga 2):** Ia faafetai i le afioga i le afioga i le Fofoga Fetalai i le avanoa. Sa i ai lava le faamoemoe, e leai se leo o lenei itumalo e tusa ai ma le Tala Faatatau Faaopopo o le Tupe, ae talu ai, ia leaga o la e faafofoga mai nisi o Matagaluega i Savaii, ia e tusa ai ma nisi o latou faamoemoega, ia e ao lava ona faaleo mo lenei Palemene.

Faatalofa atu i lau afioga i le Fofoga Fetalai, ia faatalofa atu foi i le paia maualuga o lenei Palemene, lau afioga i le Sui Palemia aemaise foi le

mamalu o le Kapeneta. Ia leaga o lea ua tuumuli atu le afioga i le Sui Palemia aemaise foi o le mamalu o le Kapeneta.

Ia, ona o lea ua tumuli atu le Afioga i le Sui Taitai aemaise foi o sui usufono mamalu o lenei Palemene, i le Fono amata a le Palemene i lenei tausaga o lo o faapea ona faagasolo.

E faatalofa atu i Ofisa Sili o Pulega o Matagaluega aemaise o Faalapotopotoga Tumaoti a le tatou Malo, aemaise foi le susu o lau Susuga i le Failautusi ma le paia o le Ofisa o le Fono Aoao.

Ia, e faatalofa atu i le tapuaiga a Samoa aoao o lo o seu tapuai mai i maota ma laoa, e le gata foi i Samoa nei, ae faapea foi i so o se tafa o le lalolagi o lo o faapea ona alaala ma papaaao ai. Malo le soifua manuia, manuia foi le tausaga fou.

Ia, e faatalofa atu foi i le tapuaiga a si ou itumalo o Gagaemauga 2, ia o outou paia ma outou mamalu, e le gafataulimaina o paia lava e tumau.

E faatalofa atu foi i le tapuaiga a le aufaigaluega tofofi o le talalelei i le amata atu lava i Fanuatanu ma Titime ma Matautu, ia seia paia foi Maloamata ma Punale, aua lo outou faafalelemalu aua le soifua faaleagaga o le tatou itumalo.

Ia, a o lenei ituaso ma le taeao na liugaluga, aua foi le faamoemoe o le Tala Faatatau Faaopoopo o le Tupe, ua i lumamea nei o le Maota Fono o Samoa.

O le Matagaluega o lo o tauave e le Afioga i le Minisita o le Siosiomaga e uiga i galuega faavaitaimi. I le agaga faafetai ma le faamalo ia i latou foi o lo o faapea ona faasoasoina nisi foi o le mamalu o le atunuu e fia autovaa atu ona o galuega faavaitaimi ma le sailiga manuia, malo le galulue, malo foi le tauatai.

A o si au tuualalo, pe le alagatatau ona silasila le Pulega aemaise foi o le Afioga i le Minisita, pe le alagatatau ona faaaoaga mai o tatou Ofisa o Fono Faavae o itumalo e faaauaala mai ai alo ma fanau a itumalo e fia o i malaga nei faavaitaimi. O se faataitaiga afai lava e aumai le lisi e toafia e manaomia, e manaia foi le faafesootai atu o Ofisa ia o Fono Faavae e aumai se tou toa-10 po o se tou toa-20 ia ona piki mai lava lea e Fono Faavae ma le itumalo, ma e malamalama foi i tagata o le itumalo o lo o faapea ona alaala ma papaaao i totonu o le itumalo. Atonu o le tasi foi lea vaega e tele ai nai faafitauli, ia ona ua soona aumai lava ae le o manino ma malamalama le itumalo i lea sui ma lea sui ma lea sui.

Ia o se talosaga lea ma le faaaloalo i lau Afioga i le Minisita aemaise foi o le Pulega o latou o lo o feagai ma galuega faavaitaimi, ae a pe a faaauaala atu i Ofisa ia o Fono Faavae ia tulaga i le aumaia o fanau aua foi le malaga atu i fafo.

Ia, e ui lava ina e le o aafia le Minisita o le Soifua Maloloina i le Tala Faatatau Faaopoopo o le Tupe. O lau Afioga i le Minisita, malo galue, faafetai tele lava. Ta te vaaia loa ua sui lou auala e te malaga ai i Savaii, ia

ua i ai foi le faamoemoe ia o sau asiasiga. O le mea lea e momoli atu ai le agaga faafetai.

O le Falemai i Tuasivi, ia le paia e o le Maota, lau Afioga i le Fofoga Fetalai, e le o se tala e aveane ai, po o se tala fatu foi, o le Aso Gafua, le aso 2 o Ianuari i le masina lenei, sa ou i ai i Tuasivi i le vaita o le tea o le 5:00. Ua fiu e sue se wheel chair, nofoa faataavalevale, e le gata i le vaega o lo o taunuu atu i ai mai, ae na ou oo lava i lalo i le mea la e taoto ai gasegase. O le tala a alii ma tamaitai o lo o tausisoifua, “Seu, a e alofa faaleo atu le faamoemoe lea, e manaomia e Tuasivi ni wheel chair i se taimi vave.” Manaia pe a ave ni wheelchair se 6 ona 3 lea o lalo i le mea o lo o taoto ai mai, ae 3 luga i le vaega o lo o faapea ona taunuu atu i ai gasegase.

Lau Afioga i le Minisita, o lea foi ua manaia le tulai mai o le Ofisa Sili o Pulega, ia e tusa ai ma lea faamoemoe.

I le tulaga o le faaletonu o le tau, e i ai nisi vaega o le matou itumalo, o lea foi e silafia e lau Afioga i le Minisita nisi foi o le Itu Asau e faaoga le fale faamamatoto, e malaga mai ua tafe le vai i Lano, ua le sao mai. A taamilo ae foi i le isi pito, ua tafe Sapapalii. A o le tatalo, o le a le mea e le faaoga ai le falemai i Vaipouli, o se nofoaga toamalie, toafilemu, o la e foi o lo o lelei le suavai sa faaoga e le kolisi i Vaipouli i la aso. Pe le alagatau, e ui lava ina manino ma malamalama le faigata o le tulaga i se masini, ia lena ua taatia atu, tea atu i tafatafa o lau Afioga i le Minisita e te silasila i ai mo le amataga o lenei tausaga ma ana feau, aemaise lava o le noatia o le faaitu lea ona o le tulaga i vai.

Ia, ua uma ona ou fesootai i le afioga i le Ofisa Sili o Pulega, e i ai le mea la e tupu i le falemai i Safotu. E pei ona ou fai atu ou te le faia se tala fatu. O le mea la e tupu i Safotu, e taunuu atu mai, ona o ifo lea o nai teine tausisoifua ma fua le fiva fua le suka, mea uma. Ona telefoni lea i le fomai la e taoto mai lona fale, e mamao ai le fale tapoleni lea e i tua. Ia, ona vili mai lea o le fomai i i le togafitiga e fai i le mai, ae le oo mai i i e vaai le mai. O le mea lea lau Afioga i le Fofoga Fetalai faapea foi lau Afioga i le Minisita ma le paia o lenei Palemene, o le mea tonu lava lea o la e tupu nei i o, ae o le falemai i Safotu, e 5 itumalo, Gagaemauga 1, 2, Gagaifomauga 1, 2, 3.

Ia o lea ua tatalo atu i lau Afioga i le Minisita, o lea foi ua faafofoga mai ua uma foi ona feiloai ma le afioga i le Ofisa Sili o Pulega, leaga e le o silafia e nisi o lea e alaala ma papaaao i Upolu nei, a o matou o la e ou te i Savaii i taimi uma ma faaiuga o vaiaso, ia o lea ua faailoa atu.

Ia, lau Afioga i le Minisita mo Galuega, e ui lava ina le o i ai se vaega o le tupe pei ona i ai le Matagaluega, o le konekarate la e maintain ina auala i o i le aluatu i Safai i le area lea a matou, ia na ona tanutanu lava i iliili foi lea o le omoomo. Afai o la e faafofoga mai, ia aemaise lava le leaga o le tau

lea na i ai i le amata atu lava i Salelologa e tau lava i tua mea o omoomo, a o omoomo, e tasi se omo.

O le mea lea lau Afioga i le Minisita, o lea e manaia isi konekarate ia e amata atu i Faasaleleaga e tau i Safai, a o le faaauau atu lea, ia na o le tanutanu lava i le iliili, a toe timu mai nanei toe omo. O le mea lea se i silasila i ai lau Afioga i le Minisita aemaise o le Pulega, aua foi lea faamoemoe.

O le patupatu i le falesa foi lea VOC i Saleia, pei lava ona matou talanoa atu i lau Afioga i le Minisita, o lena ua uma ona avatu le tusi, na avatu i le tausaga talu ai. Se i e silasila ane. Ou te le manao seiloga e tupu le faalavelave ona faatoa avatu lea o se talosaga. Ae lelei lava le tupu ae a o lena ua uma ona e silasila i ai lau Afioga, leaga e fai si pao o mea fai faaili o tapuaiga ia. E i ai taimi e le lagona ai e fanau e feoai i uta ma tai, tai ma uta, ae o lena ua avatu sina talosaga faamolemole, se i e silasila ane i lea tafa.

Ia, ua ou vaai lava ma le fiafia i le faaitu lea i le atu Aleipata i le va o Lotopue ma Malaela, ua manaia lava le ogaauala lena ua... E faapena uma lava le mea lea e tupu i o i le mea sa i ai le falemai tuai. Ou te masalo sa ou lauga talu ai pe a ma se lua mita le va o le aualatele agai i le sami, a o le taimi lenei, masalo toe afa mita talu ai le louloua o le tau ma le galugalu lea sa i ai. O le mea lea lau Afioga i le Minisita se i e silasila ae lava i lea tafa, aua e moni lava, pei e tele lava ina e afio atu ma e taamilo ane i Palauli ma agai ifo i Salega, a o lea ua matou talosaga atu i lau Afioga i le Minisita, se i e silasila ae i lea vaega. Aemaise lava o le tulaga i le taligalu, ia ae tainane foi o luma o le kolisi lea o matou i Avao, ua o atu o atu le konekarate e sua i luga le mea, a o la e ua le toe o atu e faata.

Ia na ona matou talosaga atu i lau Afioga i lea foi vaega e tusa ai ma le faamoemoe. O le mea ua leva ona tatau ona toe o atu e toe faata ma faalelei le auala.

Ia, i le gasologa o aso fiafia, e momoli atu le agaga faafetai. Faafetai i le kamupani vaa a Samoa i le va o Mulifanua ma Salelologa i le latou soifua galulue aemaise foi o le Pulega o Uafu i fale e agai i ai ma le fale malolo. Malo galulue a o faafofoga mai, aemaise foi o afioga i Kapeteni ma auvaa, malo le galulue. E matautia aso fiafia ia na uma atu nei. E leai se mataua o lo outou afu pau e puaoa i le silafaga a le Atua, aua le tautuaina o le Malo ma le tautuaina o aiga.

O le mea lea e momoli atu ai i lau Afioga i le Minisita le faafetai, malo mataala. E leai se taimi i vaa e o o i taimi uma, aemaise o avanoa e tuuina mai ona o tulaga o femalagaaiga.

E momoli foi le agaga faafetai i le Minisita o Leoleo ma le Pulega a le Matagaluega o Leoleo mo le saogalemu aua e faapito lava i leoleo lea o lo o i le matou pou. O le a se taimi o le po ou te asiasi ae i tai i le aai, o la e lava e tiute lava. O le mea lea e momoli atu ai le agaga faafetai tele lava.

Ia, e momoli atu foi le agaga faafetai i lau Afioga i le Sui Palemia aemaise foi o le Kapeneta e tusa ai ma galuega o lena tausaga. O a foi faamoemoe pei ona i ai o le faamaeaina o nisi o galuega, ia o le amataga foi lea o nisi galuega fou.

Ua sausaunua nisi o sui usufono mamalu e tusa ai ma tulaga pei ona i ai lenei foi vaitaimi ma fesootaiga i luga o le media ma uaea mosooi, ia o lena foi le lagona, ua vaai lava ma le alofa i lenei foi vaitau ma upu felafuai. Ia a o le tatalo a lenei itumalo, tatou lafoai ia, e leai lava se mea a le tatou atunuu e maua ai, ae tatou faaoloolomaau pea ma tatou tatalo pea mo le filemu, aua si o tatou atunuu.

Ia tatou talosia foi le faatafagasegase aemaise foi o le sailiilimatagi o le tatou Taitai o le Malo ma nisi foi o le Kapeneta i na foi atunuu aua foi se soifua laulelei e toe faafoi e faaauau ai tiute ma valaauina.

Ia, o se matou tala lea i lenei ituaso i le taeao na liugalua aua foi le Fonousu a Samoa i lenei foi amataga o le tausaga.

Ia manuia le tapuaiga a Samoa aoao, manuia lenei Palemene, manuia lau Afioga i le Fofoga Fetalai, ae matou maloloina atu i le alofa o le Atua. Soifua ma ia manuia.

**FOFOGA FETALAI:** Malo faafetai saunua i le sui usufono mamalu mai Gagaemauga 2. Ia, o lo o totoe lava nai tatou minute. O lea ua maitau atu ua leai se sui usufono e fia saunua, atonu o le avanoa lea e amata mai ai le saunouga a lau Afioga i le Taitaifono, ona faasolo ae foi lea o le tatou Malo i mataupu sa laga.

Tulai mai lau Afioga i le Taitaifono o lea ua... Ia, o lea sa faatali le Nofoa, ae o lea ua matau atu... Ia o le avanoa lea i lau Afioga i le sui usufono mamalu.

**Tofa Hon FAIMALOTOA KIKA STOWERS AH-KAU (Gagaifomauga 1):** Faafetai i lau Afioga i le Fofoga Fetalai mo le avanoa o lenei sui usufono. E faatalofa aloaia atu foi i lau Afioga, ae le gata i lea e le o afio mai le Afioga i le Tamaitai Palemia. E faatalofa atu i le Sui Palemia ma Minisita o le Aiga Kapeneta, ae le gata i lea o le vaega o Minisita Lagolago i lena Itu.

E faapena foi i le Itu nei i si a matou Sui Taitai faapea sui usufono mamalu o le Palemene. Faamalo faafetai i le tapuaiga a Ofisa Sili o Pulega o Matagaluega ma Faalapotopotaga a le Malo, lau Afioga foi i le Failautusi ma lou soavaa faapea le afaigaluega i le tautuaina o le Fono a le Palemene.

Ia e faapena foi ona faatalofa atu i le tapuaiga a Samoa i ona tulaga faalupe mai ona ao se i o o i ona iu, le afaigaluega tofofi a le Atua ma tulaga mamalu uma e pei ona faafogafoga mai i lenei itula o le a le toe o oi ai se leo ua maea ona paepae fanua i taeao ua sola. Ae o le a taumafai atu se sao o lenei itumalo e tusa ai foi o le tatou mataupu.



Ia o le a ou amata atu ia i le Matagaluega o le Soifua Maloloina. E faamalo atu i le Minisita o le Matagaluega faapena foi le Ofisa Sili ma le Matagaluega mo le tele o galuega o loo faapena ona punouai ai. Ae e iai nai tulaga sa ou e iu ina e leo aafia ile tulaga foi ae o mea e fia faamanatu o si ou itumalo ou te fia faaogaina ai lenei avanoa na ona tuutuu atu pea i ou talane lau afioga i le minisita le falemai o si matou itumalo e pei foi ona taua e Seu, lea foi sa ou lauga i le la tausaga ma le tausaga i tua atu e leo iai lava se tulaga e faapena ona faaleleia e tauanau pea lou fingingalo ae faapena foi le mamalu o le Matagaluega i le tele o taimi e talanoa atu o la e fai mai la o le a o atu la o atu, ae e leo iai a se tulaga faapena, faamolemole lau afioga sei toe silasila ane tele o falemai atonu o lena ua iai ni galuega ae manatua foi lenei itumalo le falemai la foi le la molimau le afioga ia Laauli aua o le matou falemai e lima itumalo o loo tautua i le falemai le la sa tagi a i lima le itumalo le la na o saili tupe e lei faatasi i se tupe a le malo poo se paketi a le falemai sa saili tupe lenei vaega i atunuu i fafo na toe faaleleia atoa ai. Ua fai si umi o lenei lava faamolemole lau afioga sei alofagia ia le falemai matea a ou tilotilo i le population lea e serve e le falemai uma atonu o le falemai lea safotu e faaluaina, faatoluina o le numera lua lea i le falemai lea i Tuasivi le aofai o tagata o loo tautuaina e lo matou falemai male agaga faaaloalo lau afioga i le minisita ia ae iai foi nai faafesili ona o tulaga foi e pei ona faasalalau solo ma ile Matagaluega o le tulaga foi lenei e iai a si popolega i le matau atu tala mai foi i atunuu mamao vaavaai atu i mea ua tutupu i atunuu mamao lea foi ua toe latalata i Niusila aemaise tala mai Nuu mamao ile tele o atunuu o le lalolagi i le toe oso maualuga i luga le pipisi o le faamai o le Koviti i isi atunuu maitau atu i isi atunuu la ua toe amata ona faamalosia mai ia talifofoga, pei ua toe tilotilo nisi e toe amata ona faamalosia borders, so e iai si popolega pe faamata ua iai sina tatou tapenapenaga ae poo monitor ia le tulaga o loo i ai i tei lava ua faafuasei ona ua na o ni popolega ma nai manatunatuga e tuu atu pea i talage o lau afioga ma le Matagaluega, talu ai nei foi sa ou tilotilo i faasalalauga i le nusipepa o loo aumai ai foi le atugaluga o le director of nursing le Peresitene o nurse lae faapea mai e moomia e le falemai pea ma le 1500 o nurses, e mafai ai ona faatino le galuega tulaga o loo iai ile taimi lenei nao le 700 ma ona tupu ia nurses so ma le tulaga lena e popole ai i tei ua iai se mea e toe oso faafuasei mai ae e tatau ona tatou tapenapena.

Ia na o na tuutuu atu o se tulaga muamua e fia avatu ai se sao o lenei itumalo e sosoo atu ai ile tulaga lena pei ona maea ona saunoa iai nisi o sui faasalalauga pei ona taofia ai officers, senior officers, principal officers ona faapea o lea o lo o fai ni saililiga i ni mea o lo o fia mautinoa ma fia faamautu.

Ae o se talosaga a lou nei sui usufono aemaise o lenei itumalo, o le a le mea e le faaalu ai pea suesuega ma ni mea ua finagalo ai le Malo, faatutumu avanoa nei ua leva tele ona... Ou te iloa o le tele o Matagaluega

lea e manaomia le faatutumuina o avanoa nei i le fesoasoani i le amoga ia i latou o lo o faigaluega i le taimi lenei, e faamama le avega. E le gata i lea o le vaai alofa i alo ma fanau o Samoa o le toatele o le au sue galuega lea e i ai nei a o lea ua le faasalalauina ia galuega nei. O se popolega foi lenei sui usufono ina ia faapena ona aveave tatou fanau ia lea ua foi mai lea ua valiago le toatele i fale, tulou lou gutu ma le afi. Ae vaai alofa i alo ma fanau ua foi mai o loo tausaili pea ni galuega o a ni suesuega ma ni sailiiliga o fai, faaalu. Ae ou te tatalo atu ave se avanoa se i maua ai ni galuega lea sa tigaina e invest i alo ma fanau e foi mai e tautua le atunuu a o lea ua leai ni galuega.

E pei o se tulaga lenei e fia avatu ai se tuualalo, o le isi o tuualalo faamolemole ua leva e le i toe siiina leai se siitaga. Faafetai lava i le aufaigaluega a le Malo i le tali mai lea a Matagaluega, lea Matagaluega ma lea Matagaluega po ma le ao, ao ma le po o lo o tautua pea le atunuu. Ae paga lea i le freeze la lea ua leai ovataimi, alauni mea e tataua ona totogi atu. E le o le tulaga ea lea tatou te popole ai fai mai o le a o uma ae e le o se tasi lea o mafuaaga lea ua... Po o le a le lelei o lata tikeri lea na i ai ae ou iloa e sili atu le tupe a lo'u aiga e maua mai la'u galuega tiai la'u tikeri lea na maua ae ou alu i le mea e maua ai. Ma o la'u aiatatau lea ia ua na o se vaivaiga o lou nei sui usufono, o le ala lenei o lea tatou te popole ua o leoleo, ua o fomai ua o nurses ua o pai ua o lafai lea le mea e ala ai na o? Tatou fesili le a le mea e ala ai ona o? Ona e tele atu le mea lea maua mai fafo e aumai e fesoasoani i aiga. O lo'u mitamitaga lea i totonu o lo'u itumalo le mativa o Savaii ae finau a e le tagolima ae faafetai i le mea lea pei o sau mea fiafia ou te oo loa i Savaii, na oo loa lea i le afiafi ua paolo le la ou alu loa faasolo taamilo. E pei se mea fiafia ia te a'u lo'u vaai atu tu le fale palagi o i i, oka se fale o i nai olomatutua ma toeaiina ua feoai i taavale sa leai se olaga faapea na maua. Ua i ai pusaaisa e teu ai nai meaai e maua sa leai ni mea faapena i latou aiga so o la'u lea atugaluga lea i ai nei tatou ave le faamuamua i le mea e tatou te iloa e manuia ai tatou ma o tatou aiga ma tatou fanau o tatou nuu o tatou Ekalesia ae tatou silasila totoa i le mea e tataua ona ave i ai le faamuamua, siitaga o totogi o tagata faigaluega. A faapea o le a taofi ovataimi, taofi alauni ma a uma isi mea ae leai se siitaga o totogi, o le a faafefea ona o ta nofonono i i pea o ta iloa, ua ta oi, faafefea ona o ta ausia le tausiga o lata fanau ma lota aiga ma lota nuu ma lotu ma mea uma lava? E pei o ni ou vaivaiga ia faagata ai i ina lenei vaega.

Ae talu ai le mea le na tupu mai i le vaiaso lea na tea nei leaga lea e le o afio mai le Taitai o le Minisita o Leoleo ae ou te talitonu lea e i ai le Sui Palemia e tuutuu atu a i autafa o a fa au toe silasila i le puipuiga o le saogalemua o i latou taualoa i le mea lea na tupu mai i le Taitai o lenei Itu, e tagi uu le lotu pe a toe faafoi mai...

**FOFOGA FETALAI:** Ia ua vaelupeina le saunoaga o le sui usufono mamalu o lea ua matau atu lea ua taunuu i le tatou taimi tatou te malolo ai aemaise foi o nisi foi o saunoaga taua ai foi tulaga o lea ua uma ona fai le lafo ma ua manatu foi le nofoa e le tatau ona toe taua i tatou saunoaga ua uma aveeseina saunoaga , ae taua foi le saunoa foi le sui i mea nei o alauni ma ovataimi atonu o lea faafogafoga mai le paia o le Kapeneta ina ia faamanino foi pea faapea ise taimi o le malo ao le taimi lenei oute momoli atu le agaga o le faafetai tele. O lea ua o tatou taunuu mai i le faaiuga o tatou galuega i lenei aso e tusa ma le lafo momoli atu ai le faafetai a le Fofoga Fetalai e le gata i sui mamalu sa sausaunoa i lenei aso ae o le lava papale foi o le tatou maota mo le taumafaiga foi o le tatou galuega. O le mea lea malo faafetai e iai le manatu ua tau ona fai se tatou malologa pea tala aao ma afifio atu le paia o le tatou maota i lenei afiafi. Ia alofa le Atua ma puipui lo outou soifua i ala uma o le a uia ia alofagia foi i lona agaga ia maua se tatou faigamalologa i lenei po,tatou talosia i se ola ma se malosia le aso a taeao i le alofa o le Atua e faaauau ai la tatou galuega.

Ae tatou te le i tolopo, e talosaga atu ma le faaaloalo i le sui usufono mo Vaisigano Nu 1 se i saunia mai se tatou tatalo e faaiu ai le tatou Fono.

*Na faataatiaese Galuega a le Fono Aoaofaitulafono i le itula e 7:03 i le afiafi seia aulia le itula e 9:30 i le taeao o le Aso Lulu, 18 Ianuari 2023.*